

KILISTÒ MUMANYÌSHÌIBWE

WA BIKONDO BYÔNSÒ

 Ndambù wa Mifundu mwaba ewu yîndi muswè kuleedila dilòlòlò edi. Mwaba munkaci mwà kwela meeji ku cyena-bwalu cyà citùdì balwile mwaba ewu. Ndi muswè kubala bwà citupà cyà Mifundu, cîndi ngèèla meeji nè cyònsò, disangisha dyònsò, bivwa bikèngela bwà kwikale Dîyi dyà Nzambi dibadiibwemù. Bwalu, ndi mumanyè nè Yêyè mmufwànyine kutwilangana neetù katùyì tubala Dîyi to, kàdi ndi nè bwôwà bwà dikèma bwà nè nkwèpi kungààlwà kwenza cilèma. Pa nàнку mèmè mubalè Dîyi Dyèndè, ndi mumanyè nè kakwèna cilèma mu Dyòci to. Pa nàнку ndi—ndi mbala Dîyi Dyèndè, díbà adi ndi mumanyè nè cintu kampàndà necifuminè mu disangisha, bwà dibala dyà Dîyi Dyèndè.

² Nènku ki bwà cinyì, bashìndàmìjile meeji ètù pa Mufundu utwàbalà, mwaba wùmwèpelè wùdi wùsanganyibwa mu Yone Munsantu, nshapità wa 10, kubangila ku mvensà wa 32 nè wa 39, mukùmbajilakù; pashìishe mu cyena-bwalu cyà kale cyà ciibidilu, Ebèlù 13.8. Mpindyewu mu Yone Munsantu, nshapità wa 10, kubangila ku mvensà wa 32, tudi tubala nùнку.

Nènku *Yesù wàkabàndamuna nè: Ndi munùleeje byenzedi bîmpè byàbùngì byà kùdì Taatù; mbwà cyèpi cyà ku byenzedi ebi cinùdi nungaashila mabwe?*

Beena Yudà kumwandamunabò, bàmba nè: Kì mbwà cyenzedi cîmpè citùdì tukwashila mabwe to; kàdi bwà dipenda dyà Nzambi; nènku bwalu...wèwè, mwikale muntu, udi udiwija Nzambi.

Yesù kubàndamuna nè: Kì mbafunde mu mikenji yènù amu nè: Mèmè ngàkamba nè: Nudi banzambi anyi?

Pùkalàye wàkabàbùkila nè mbanzambi, bàvwà dîyi dyà Nzambi dîlwila kùdìbo abu, nènku mifundu kayèèna mwà kunyangakajiibwa nànsha;

Nudi nwamba ewu, udi Taatù mujidile, nè mutùme mu buloba awu nè: Wèwè udi upenda Nzambi; bwalu ndi mwambe nè: Ndi Mwànà wa Nzambi anyi?

Mèmè ncìyi ngèza byenzedi byà Taatù wanyì to, kanùngiitabùùjì to.

Kàdi mèmè mbyènza, nànsha nwènù kanùyì nungiitabuuja mèmè to, itàbùùjaayi byenzedi: bwà nwènù kumanya, nè kwitabuuja nè, Taatù udi munda mwànyì, nè mèmè munda mwèndè.

Ki bwà cinyi bààkakèba kàbidi bwà kumukwàta, kàdi wàkabàfinuka mu byanza,

3 Nè mu Ebèlù, nshapità wa 13 ku mvensà wa 8.

Yesù Kilistò umweumwe awu makèèlèlè. . . leelù ewu, nè bwà kashidi.

4 Tùsambilàayi. Taatù wa mu Dyulu, jidilàku mùsànjeelà dilòòlò edi, Mukalenge, bwà Mukenji, nè mutèèleji wa Dîyi, bwalu tudi tulòmba nùnkù mu Dîná dyà Yesù. Amen.

5 Mpindyewu patùdi tuseemena ku cyena-bwalu eci apa, ànu kaacyena-bwalu kakesè kàà kwisùkwisù bwà dilòòlò dyà kumpalà, bwà kumanyangana, Ndi muswè kwangata cyena-bwalu, kùdi. . . *Kilistò Mumanyishüibwe Wa Bikondo Byònsò.*

6 Mpindyewu Mukàndà wà Ebèlù mwaba ewu wùdi wùtwàmbila nè Yèyè ùdi umwèumwè awu makèèlèlè, leelù, too nè kashidi.

7 Nènku tudi tubala mu Bible mwaba ewu nè beena Yudà aba bàvwa bàMwela makonka. Tudi tusangana beena Ngelikà bàMwela makonka. Nènku cìvwa lukonko lwà dîbà dyònsò. Cìvwa mbwalu bantu bààbùngi menemene bàdi nè mumvwija mashiilàngàne à Yèyè.

8 Kakwèna muntu nànsha umwe ukààdikù muumvwe bààkula Bwèndè kàdi kàyi mujinge bwà kuMumòna to. Ndi mutwishüibwe nè bu mémè mwà kukonka dilòòlò edi nè: “Mbanganyì bàà kunùdi bàdi baswè kumòna Yesù?” cyanza cyònsò ncifwànyine kwediibwa muulu. Kakwènakù—kakwènakù muntu nànsha umwe ukààdikù muumvwe bààkula Bwèndè kàdi kàyi mwà kuswa bwà kuMumòna to.

9 Kùdi cintu kampàndà bwà bwalu bwà Dîná Dyèndè mene, cìdi ànu. . . cìdi ànu citùsalula's. Kùdi cintu kampàndà pa bwalu abu cìdi citùpisha mwoyi wètù nè disànka, ànu bwà kuumvwa Dîná adi, Yesù. Bwalu, mu Dîná adi tudi nè difwidiibwa dyà luse ku mpèkaatù, tudi nè bupikudi bwètù, bwalu dîkù dijimà mu Dyulu nediikalè. . . ndyambùle Dîná adi. Nè pa nànkù tudi. . . Nzambì wàngata Dîná dyà buntu edi bwà kutèèkiibwadì pa Yèyè mwinè pààkamwèneshiibwàYe mu mubidi apu. Dîná kaayi dilenga's wè!

10 Mpindyewu tudi—tudi twela meeji nè Yèyè mmunène bikolè! Nènku munda mwà bikondo, muntu yònsò wàkeela lubilà bwà kumòna Nzambì. Mpindyewu lutàtù lùdiku, kacya ku cikondo cyà Yobò. . .

11 Ngèèla meeji nè Yobò wàkabadiibwa bu wùmwe wà ku Mikàndà yà kale menemene yà Bible. Wàkatèèkiibwa ànu munda amu. Wàkafundiibwa mu cikondo cyà Mòsà, Mòsà mwikàle ùfunda mi—mikàndà yinaayi yà ntwàdijilu ayi.

12 Mpindyewu tudi twitabuuja nè—nè Yobò, muntwamu, wàkeela lubilà lukolè musangu kampàndà nè: “Bu mémè ànu

mwà kuMumòna's wè! Bu mèmè mumanyè mwaba wùmvwà mwà kuyila ku nzùbu Kwèndè! Ndi muswè kuya," mu ngaakwilù mukwàbò nè, "kukookola ku ciibi Cyèndè."

¹³ Twètù bònsò tudi bamanyè nè tudi bafùmìne ku mwaba kampàndà. Tudi paanyimà pàà rìdò kampàndà utùdì... Kùdi cintu kampàndà mu twètù emu, cìdì cikèba kufika ku cintu kampàndà, bwalu tudi bamanyè nè tudi bafùmìne mwaba kampàndà. Katwèna mwà kwikala ànu mutùdì emu kakùyì cintu kampàndà paanyimà pèètù bwà kutwènta to.

¹⁴ Dìbà dyànyì dyà ku dibòko kadìvwa ànu mwà kwikala dyenzèke to. Muntu kanà yònsò udi nè meeji majaalàme mmufwànyine kumanya nè dìbà adi, bilengà, nè dituuta dyà dìbà, nè dijaadika, nè mánùvelè, nè—nè tulonda, kabivwakù mwà kwikala bidyènzèkèle to. Kabyèna mwà kwenzekakù to bwà kudyènzekelabi.

¹⁵ Tàngilàayi bufùki bukwàbò abu, mùdìbi bitwàngaja pàmwè. Tudi bamanyè nè kabìvwa mwà kwikala bidyènzèkèle to. Mùshindù kaayì ùdì muntu mutàmbe dìbà bunène's wè! Muntu ngwakenza dìbà, nè kudìjaadika, nè kudikwàtakaja pàmwè. Nànkù pìikalàbi kabiya mwà kwenzeka bwà dìbà adi kwikaladi ànu didyènzèkèle, mmunyì mùdìbi bitàmbe kukola bwà kudyènzekelabi nè wèwè nè mèmè twikale kaaba aka? Kùdi nè cyà kwikala mufùki kampàndà paanyimà pèètù. Twètù tutàngila bufùki Bwèndè bunène, mùdìbu bùkwàta mudimu, nè mùshindù wùdìYe nè mwoyi munda mwàbù, mmusòmbèlemù.

¹⁶ Tudi tumòna dibèjì, mùdì dibèjì dilembèlèle pa mucì. Nènku lwà munkàcinkaci mwà ngondo wa cimungu wa mashika amu, kakùyì mabungi anyì ní ncinyi cyònsò to, mwoyi wùdì wùmukakù nè wùpweka mu miji. Dibèjì didi dìmata nè diya buludì panshì pa mpàla pàà buloba. Mpindyewu bwalu bùdì cinyi's? Kùdi Lungènyì kampàndà lùdì lwàkula naadi. Mucì kawùtu nè lungènyì lwà nkààyawù to. Pa nànkù mwoyi wùdì wùpweka mu muji wà mucì, bwà kusokomawù ku mashika. Wòwù... Wòwù mushàale kuulu aku, mmufwànyine kufwà, muvù wà mashika awu newùwùshipe.

¹⁷ Mpindyewu dibèjì adi didi dyenza cinyi? Didi dishàala pa buloba nè dibola. Mwoyi wùdì wènta cinyi pàdiwu mu muji apu? Wùdì wùkòka cintu cìdì mu dibèjì difwè adi, kalisiyumù nè cyònsò cìdimu aci, nè wùbànda cyàkàbìdì mu muvù wà bintu bitòloka, nè wàlukila buludì mu kaaba kààwù cyàkàbìdì, wùtwàla dibèjì dikwàbò. Mbujaadiki; lufù, dijiikiibwa nè dibìika dyà ku lufù.

¹⁸ Dìbà didi dibìika mu dindà, bu mùdì mwànà mukesè mulediibwe. Pa dìbà mwandamukùlù anyì citèemà jaajaaja didi mu kàlaasà. Pa dìbà dikùmi jaajaaja dikaadi dipàtùke mu kàlaasà. Pa dìbà dikùmi nè ibidì dikaadi mu bidimu byàdì byà munkaci. Nè pashìishe dibanga kufwà, difwa kàbìdì nè dibwela

mu Wesètè. Kwàdi kwàjiki anyi? Didi dijuuka dindà didi dilondà, bwà kufila bujaadiki; mwoyi, lufù, dijiikiibwa, dibìikà dyà ku lufù. Bintu byònsò, byònsò, Nzambì ùdi nè mwoyi mu bufùkì Bwèndè. Ùdi wènzà nànkù nè mmucyènzè munda mwà bikondo byònsò.

¹⁹ Mpindyewu, mùshindù wùmwpèlè wutwikalàku mwà kujandula Nzambì ní ùcìdi ànu nè mwoyi. Tudi mwà kuMumòna mu bufùkì Bwèndè, kàdi mùshindù wùvwà Nzambì muDileejè patòòke kùdi bantu bàdi. . .

²⁰ Muntu kampàndà ùdi wàmba nè: “Èè, Nzambì wèpì? Nwènu’s nudi nwamba byàbùngì bwà bwalu Bwèndè.”

²¹ Mu Àfrikè, mu madimi à bwambi mwàmwa, nè munkaci mwà—mwà ba-Afrikaans, bàdi bàkwàta mudimu nè mwàkù wà *amoyah*, wùdi wùmvwija nè, “bukolè bùdi kabùyi bumweka,” bu mùdi lupeepèlè. “Nzambì webè,” mùdiye wàmba, “Nzambì udi kàyì ùmwènèka awu, Yèyè—Yèyè ùdi bu cipeepèlè. Yèyè ùdi bukolè abu, kàdi twètù—twètù katwèna tuMumòna to.”

²² Èè, mèmè ndi ngiitabuujà nè tudi mwà kuMumòna. Bwalu, tudi tusangana mu nshapità wa 12 wa Yone Munsantu nè, bàmwè beena Ngelikà bàakalwa bwà kumòna Yesù, ke bôbò kwamba nè: “Bakalenge, tudi baswè kumòna Yesù,” nè bàvwà bayè naabù kùdiYe, kùdi umwe wa ku bayiidi Bèndè. Nè Ebèlù 13.8 mmwambè nè: “Yèyè ùdi umwèumwè awu makèlèlèlè, leelù, too nè kashidi.” Nènku bu Yèyè mwà kwangaciibwa mu matùkù awu, kùdi umwe wa ku bayiidi Bèndè bwà kumumònabò, bwà cinyi katwènakù mwà kumumwènèna kùdi bayiidi Bèndè, dilòòlò edi, kufikisha bakèbì mu Bwikadi Bwèndè, piikalàYe umwèumwè awu makèlèlèlè, leelù, too nè kashidi? Bible ùdi wàmba nè ke cìdiYe: “Yèyè ùdi umwèumwè awu makèlèlèlè, leelù, too nè kashidi.”

²³ Mpindyewu, ndi mumanyè nè eci cìdi cyùmvwika cicolè be. Kàdi bu nwènu ànu mwà kutùtwàlakù katanci kakesè cyanààna, ndi ngiitabuujà nè mèmè, ku dikwacisha dyà Nzambì, ku Dìyì Dyèndè nè bilondèshile Dìyì Dyèndè, ndi mwà kuMufikisha apa mene kumpàlà kwènù. Nè pashiishe, aci, mbusàmbi kaayi’s wè! Ke citùdi balwilè kaaba aka ncyôci aci. Twètù beena Kilistò tudi kaaba aka bwà kupeta busàmbi, bwà—bwà kufikisha, kubwela mu Bwikadi bwà Nzambì utùdi bamanyè awu, udi mwà kutùbiisha bu mùdiYe wènzà dibèji amu, udi mwà kutwàluja.

²⁴ Mbwalu ànu bufwikakaja anyi, ndambù wa mēyì matèèka ànu pàmwè anyi, mmyanu yà cyena Yuda anyi, peeshì m’Bulelèlè? Mwaba wùdi ntùpàkànyì bùngì kampàndà, bikèngela kwikalè Bulelèlè mwaba kampàndà. Mwaba wùdi ndola wa mafi awu, nēngāmbè nè kùdi wa cyà bushùwà mwenzela ku yèyè awu. Nènku mwaba wùdi ditentula bùngì cyanààna, nè bintu bùngì cyanààna bitùdi tumòna leelù ewu

ebi, kùdi nè cyà kwikala Nzambi mushùwashùwâlè mwaba kampànda.

²⁵ Mpindyewu twètù katùyì tuMukwàcila mudimu to, díbà adi tuumukàayi ku cintu citùdi twenza aci tuye tùMusadilè. Bwalu, ndekeelu wa byònsò, dijìkula dyètù adi dìdi nè dyambulwisha kaayi pìikalàku kakùyì cintu nànsha cìmwè? Nè meeji ètù matòòke kaèna—kaèna mwà kutwèpula ku dipiishibwa to. Bampàngaanù bàtu nè meeji matòòke. Bantu bàtu misangu mikwàbò bànwa àsìdè phénol, nè meeji matòòke, beela meeji nè bàdi munkaci mwà kwangata cintu kampànda cikwàbò. Meeji matòòke kaèna àcyènzà to. Bikèngela ciikale mùshindù wùdi mujaalàme, nè mùshindù wùdi mubi.

²⁶ Mémè ndi ngiitabuuja nè Bible mmubinge. Ndi ngiitabuuja nè Díyi dyà Nzambi ndilelèlè. Mpindyewu bikèngela Nzambi àlumbulwishè, [Mwanèètù Branham ùdi ùkèkemenà—Muf.] (Mfwilaayikù luse.) Bikèngela Yèyè àlumbulwishilè bàà—bàà pa buloba ku cintu kampànda.

²⁷ Mpindyewu pàncìvwà mwànà mutekète, díkù dyànyì kumpàlà kwànyì, kì n'taatù wanyì nè maamù to, kàdi kumpàlà kwàbò, tuvwa ba-Irlandais ku nseke yònsò yibìdi, pa nànkù, twètù, cìvwà Kàtòlikè nè bìvwà ànu bipeepèlè bwà mémè kwalukila ku èkèleeziyà wa Kàtòlikè. Èè, wanyì taatù nè maamù bàvwà basèlàngàne pambèlù pàà èkèleeziyà, nè kabàvwà bàya mu èkèleeziyà to. Nè pashiishe pangààkafika mu cikondo kampànda, bwà kumanya nè Nzambi ùvwaku, bu mùdi bààbùngì bàà kunùdi babalè mukànda wànyì, mvwa—mvwa mumanyè nè kùvwà Nzambi mwaba kampànda.

²⁸ Kàdi mpindyewu, meeji à cyôci aci àdi nè, pìikalàbi nè Nzambi neàlumbulwishilè bàà pa buloba ku èkèleeziyà, díbà adi neciikalè èkèleeziyà kaayi's? Byôbi nè ng'èkèleeziyà wa Kàtòlikè, díbà adi ng'èkèleeziyà wa Kàtòlikè kaayi? Wa cyena Loomò, wa ba-Orthodoxes, anyì ngwèpi wíkalàYe mwà kubàlumbulwishilakù's? PìikalàYe mwà kubàlumbulwishila ku beena Mishòonyi, nku ba-Méthodistes, ba-Baptistes, beena Mpenta, ba-Presbytériens anyi? Ngwèpi awu? Nwamònu's, kùdi cibwejàkàjì cipite bùngì.

²⁹ Pa nànkù muntu kampànda mufwànyìne kwamba nè: “Èè, cìdi ànu . . .” Kaa, èyowà's, bìdi nànkù's. “Kabyèna nè bwalu to, paùdi ànu nè meeji matòòke.”

³⁰ Mukànda wà kumpàlà mu Bible, cyàkakèbà lufù, bubèedi, tunyinganyinga, nè mpèkaatù, mbwalu muntu umwèpelè wàkabenga kwitabuuja Díyi òmwèpelè. Mu Mukànda wà ndekeelu wà Bible, Nzambi umwèumwè awu, mu Bwàkabuulwibwà 22, mmwàmbè nè: “Ewu yònsò wadidìnga kuumushila Díyi òmwè, anyì kusàkidilaKu díyi òmwè awu, cyèndè citùpà necyùmushiibwe ku Mukànda wà Mwoyi.” Pa nànkù aci cìdi nè cyà kwikala Mukànda wà cilumbulwidi.

³¹ Mpindyewu tudi tusangana, nè: “Ku cibangidilu,” Yone Munsantu 1, “ku cibangidilu kwàkadi Diyì, nè Diyì dyàkadi nè Nzambì, nè Diyì dyàkadi Nzambì. Nè Diyì dyàkavwijiibwa mubidi nè dyàkasòmbela munkaci mwètù. Twètù twàkaMutàngila, mulela umwe wa Taatù, nè Diyì Dyôdi diinè adi, Nzambì, wàkavwijiibwa mubidi nè kusòmbela munkaci mwètù.”

³² Ebèlù 13.8 ùdi wàmba nè: “Yèyè ùdi umwèumwè awu makèèlèlè, leelù, too nè kashidi.” Dìbà adi piikalàbi nè Yèyè ùdi umwèumwè awu, nè n’Diyì, dìbà adi mmunyi mùdi Diyì diDimanyisha munda mwà bikondo bikwàbò byònsò? Nebikengelè bwà kuDyènzelaci mùshindù wùmèwùmwe awu leelù ewu, bwà kwikalaci Yesù Kilistò umwèumwè awu makèèlèlè, leelù, too nè kashidi. Aci’s ng’ànù Bulelèlè. Yèyè ùdi Diyì, nè mwaba...mùvwà Diyì dyambiibwe mu bikondo bikwàbò byònsò, Nzambì kàtù ùDishintulula to, Maalàkì 1, anyì, Maalàkì 3.6 ùdi wàmba nè Kèna ùshintuluka to: “Mémè ndi Nzambì, Ncyèna nshintuluka to.”

³³ Pa nànkù ànu menemene mùshindù wàkadiYe ku cibangidilu awu, ke mùdiYe leelù ewu. Nè Yèyè ùvwà Diyì, kùdi bukwàbantu, ku cibangidilu. Nzambì kàakapèèshaku bukwàbantu èkèleeziyà bwà kwimanyina paanyimà to, kàakabàpèèshaku twitabàayi kampàndà bwà kumwimanyina paanyimà to. Yèyè ùvwà mukolèshe muntu nè Diyì Dyèndè nè: “Itàbùùjà Diyì edi wikalà nè mwoyi!” Ncintu cimwècimwè aci leelù ewu. Nè Kilistò ùdi Diyì adi: “Ku cibangidilu kwàkadi Diyì, Diyì dyàkadi nè Nzambì, nè Diyì dyàkadi Nzambì. Nè Diyì dyàkalwa mubidi nè dyàkasòmbela munkaci mwètù.” Mpindyewu, cìvwàYe mu bikondo bikwàbò aci, dìbà adi Ùdi nè cyà kwikala umwèumwè awu leelù ewu, Yèyè mushààle umwèumwè awu makèèlèlè, leelù, too nè kashidi. Bwalu, ndi ngèèla meeji nè ndi mucyumvwije kantu nè kantu nè n’Yesù Kilistò umwèumwè awu makèèlèlè, too nè kashidi, nè Yèyè ùdi Diyì.

³⁴ Mpindyewu, Yesù wàkamba nè: “Mifundu kayìvwa mwà kunyangakajiibwa to.” Mifundu yìvwa milelèlè. Nè Mufundu wùdi wàmba, mu Yone Munsantu 1, nè: “Diyì dyàkavwijiibwa mubidi, nè dyàkasòmbela munkaci mwètù.” Nzambì wàkalwa mubidi, mu Mwàn’Èndè, Yesù Kilistò, nè wàkasòmbela munkaci mwètù. Mu Yone Munsantu 10.35, Yesù wàkabiikila aba bàvwàYe mulwè kùdìbo, bàvwà Diyì ku cibangidilu abu: “bapròfetà.” Yesù wàkamba kaaba aka nè: “Mikenji yènù nwènù biinè yidi yinùlongesha nè, aba bàvwà Diyì dyà Nzambì dìlwa kùdìbo abu, nè Diyì dyà Nzambì dìvwa dìlwa kùdi bapròfetà.”

³⁵ Mpindyewu Ebèlù, nshapità 1, ùdi wàmba nè mu...mmwambè nè: “Nzambì, mu bikondo byà kale,” nè aci’s mmisangu yà kale, “mu mishindù mishilèshilàngàne wàkaakula nè baataatù, ku bapròfetà; mu ditùkù dyà ndekeelu edi ku Mwan’Èndè, Yesù Kilistò.” Nwamònu anyì?

³⁶ Mpindyewu, mōnaayi mpindyewu, Nzambi! Yesù wākamba nè: “Aba bàvwà Dìyì dilwa kùdìbo abu, bàvwà bàbìkidiibwa nè ‘banzambi,’” bàvwà bapròfetà abu. Mpindyewu, kî mmuntu yêyè mwinè uvwa Nzambi to, ànu mùvwà mubidi wà Yesù Kilistò kawùyi Nzambi amu. Yêyè ùvwà muntu, nè Nzambi ùvwà mubwikila paanyimà Pèndè.

³⁷ Nzambi ùtu misangu yònsò ànu muDìbwikile kule nè bantu bònsò, nè muDìbuulule kùdì bantu bìikala mwà kuciitabuuja. Nzambi! Mu dyàlumingu dishààle edi, ku tabernacle, mvwa muiishe pa *Nzambi Mubuulula*. Nzambi ùtu misangu yònsò ànu ùDìbwikila paanyimà pàà cintu kampàndà, bwà bantu bàà pambèlu kabàmanyiku kantu nànsha kàmwè pa Yêyè to. Kàdi Yêyè ùdì ùDìbuulule kùdì bàna Bèndè nè kùdì aba bàdi baswè kubwela paanyimà pàà cibwikilu aci.

³⁸ Mu Dipungila Dikùlukulu mùvwà bisèba byà tusengelanshimbà bìvwà bisokoke Nzambi. Ùvwà mu Butùmbi bwà Shekinàh. Cìvwà mpaanyimà pàà biseba byà tusengelanshimbà. Kumpàlà kwà kwikala paanyimà pàà biseba byà tusengelanshimbà, bôbò. . .

³⁹ Dìyì dìvwà munda mwà Mòsà, mupròfetà awu. Yêyè wākabànda pa mukùnà. Yêyè wākatuutakeena nè Dikunji dyà Kapyà, nè Dyôdi dyākaakula nendè. Wākapweka nè kwenza bimanyinu byà mupròfetà, wākapātula bānà bàà Izàlèlā mu Èjiiipitù, too nè ku mukùnà ewu. Ke pashiishe Nzambi kutuuluka nè kumanyisha Mòsà, pa kumubweja mu Dikunji dyà Kapyà adi, nè kuMubwikila. Muntu mukwàbò nànsha umwe kàvwakù mufwànyine kuya to. Muntu nànsha umwe kàvwakù mufwànyine kuteeta kutentula aci to, kàvwakù mufwànyine kucyènzà to, ùvwà ùfwa. Kwangata muntu umwèpelè, kubwelayè paanyimà apa, kubwela mu Dikunji dyà Kapyà, kubwela mu Butùmbi bwà Nzambi, nè kubwela mu Butùmbi bwà Shekinàh; nènku pààkapātukaye nè Dìyì adi bwà cikondo aci, ùvwà ukenka bikolè nè Butùmbi bwà Nzambi mu mùshindù wà nè byākakèngela bwà kubwikilayè mpàla wendè. Bantu kabavwaku mwà kushààla bamutàngile yêyè to. Nènku ke cìvwà cibwikilu cyà mubidi ncyôci aci.

⁴⁰ Ncinyì ciine aci? Pàdì muntu ubwela dyàmwàmwà dyà cibwikilu aci, ubwela mu Butùmbi bwà Shekinàh mpindyewu, bàà pa buloba bàdì bamubiikila nè mmukoleshi wa maalù. Kabènga mwà kumòna cìdì cìbì to. Kàdi paanyimà apu, kakwèna bulenga kùdiye to. Mmufwànyine kwikala kàyì ùjikula mèyi èndè mu òwò to. Yêyè—yêyè kî mmufwànyine kulwàta bîmpè to. Kî mmufwànyine kwikala kàyì ùlwàta bilàmbà byà balombodi bàà èkèleeziyà to. Yêyè kàvwà mufwànyine kulwàta mùshindù wùvwàbò bèèla meeji nè ngùvwayè ùkèngela awu. Bìdì mwà kwikala nàнку, kàdi, nudi numòna’s, munda amu, paanyimà pàà cisèbà cyà kasengelanshimbà aci, paanyimà pàà cisèbà cyà buntu aci, mwómò amu mùdì Butùmbi bwà Shekinàh,

mwômò amu mùdi bukolè, mwômò amu mùdi Dîyì, mwômò amu mudì mampà à baakwidi. Nènku Butumbi bwà Shekinàh, bùdi bwikàle Bukênkè abu, bùdi bwènza Bukênkè bùdi bùbobesha lutete.

⁴¹ Nwênù beena mu Kansas nudi bamanyè aci, ku dinowa dyènù dyà blé adi. Kakùyì dîbà adi to, kabwàkuuumakù to.

⁴² Nènku too nè pawàlwà paanyimà pàà cisèbà cyà kasengelanshimbà aci, too nè pawàpàtuka mu cisèbà cyèbè cyà kale aci, meeji èbè à kale awu, twitabàayi yèbè yà kale ayi, nè kubwela mu Bwikadi bwà Nzambi; dîbà adi Dîyì didi dilwa bulelèlèlè bùdi nè mwoyi bwèbè wèwè, dîbà adi udi mutàbàle nè Butumbi bwà Shekinàh, dîbà adi Bible ùdi ùlwa Mukàndà mupyamùpyà, dîbà adi Yesù Kilstò ùdi umwèumwè awu makèèlèlè, leelù, too nè kashidi. Udi nè mwoyi mu Bwikadi Bwèndè, udyà mampà à baakwidi àdì ànu malongolola ditùkù adi bwà beena kwitabuuja, ànu baakwidi nkààyaabò. “Nè twètù tudi baakwidi, bwakwidi bwà bukalenge, ditungà dyà cijila, cisambà cyà pawàci, biikàle tufila milàmbù yà nyumà kùdi Nzambi.” Kàdi udi nè cyà kubwela, kuya paanyimà pàà cibwikilu, bwà kumòna Nzambi mubuulula awu. Nè Nzambi mmubuulula, aci's n'Dîyì Dyèndè dimwèneshiibwe.

⁴³ Mpindyewu leelù ewu tudi nè bantu bààbùngì bàdì bamba nè: “Èè, twètù, bu *cikampàndà*, tudi tuCìitabuuja mùshindù *kampàndà*.” Cisumbù cikwàbò cidi cyamba nè: “Twètù, bu *kampàndà*, tudi tuCìitabuuja mùshindù *kampàndà*.” Nwamònu's, nudi nupeta muumvwijja búngì cyanààna!

⁴⁴ Nzambi kàtu dijinga nè muumvwiji nànsha umwe to. Yèyè ùdi ùmvwija Dîyì Dyèndè Yèyè mwinè. Bible ùdi wàmba nè: “Kì ndyumvwija dyà muntu pàà nkààyèndè to.” Nzambi ùdi ùbuulula, Yèyè mwinè. Udi wènza nànkù! Ku cibangidilu, Yèyè wákamba nè: “Bukênkè bwikalèku,” nè bukênkè bwàkiikalakù. Aci kacyèna cikèngela dyumvwija nànsha dimwè to. Nzambi mmwàmbè nè: “Virgò neimitè difù,” ke cyàkenzàye. Aci kacyèna cikèngela dyumvwija nànsha dimwè to. Nzambi wákamba nè: “Mu matùkù à ndekeelu,” Yèyè ùvwa mwà “kupòngolola” Wèndè “Nyumà pa mubidi wònsò,” ke cyàkenzàYe. Aci kacyèna cikèngela dyumvwija nànsha dimwè to.

⁴⁵ Cìcidi ànu Dîyì! Dîyì didi Nzambi. Nzambi, mu cikondo nè cikondo cyònsò, ùkaadi mumanè kwabanya Dîyì Dyèndè búngì kampànda. Nènku mwômò amu, tàngilàayi cyàkenzàYe, Wàkatùma mu—mupròfetà. “Nè Dîyì dyà Mukalenge ditu dilwa kùdi mupròfetà.” Mupròfetà ùdi ùDìbuulwila batèeleji, nè batèeleji bàDìitabuuja. Nènku, dîbà adi, aci's n'Nzambi mu mudimu, Nzambi ùkwàta mudimu ku Nyumà Wèndè.

⁴⁶ Mpindyewu tudi tusangana nè Yèyè wàkaDimanyisha bu Mwàna wa muntu kaaba aka, mpindyewu, bwà kuuja. Mpindyewu, pàakalwàYe pa buloba, vùlukàayi nè, Yèyè

wàkaDimanyisha kùdì bantu bònso, pambèlu, WàkaDimanyisha Yèyè mwinè bu Mwànà wa muntu. Wàkalwa mu mènà àsàtù à mwànà; Wàkalwa bu Mwànà wa muntu, Mwànà wa Nzambi, Mwànà wa Davidi. Mpindyewu, *Mwànà wa muntu* ùdì “mupròfeta.” Nànsha Yèhowàh Yèyè mwinè wàkabiikila Yèhezèkèlè, kwamba nè: “Mwànà wa muntu.” Yehowah, wàkula nè muntu, mupròfeta, ùmubiikila nè: “Mwànà wa muntu.” Nè Yesù wàkaDimanyisha bu Mwànà wa muntu, bwalu Mifundu kayèna mwà kunyangakajiibwa to.

47 Mu Dutèlònòrà 18.15, Mòsa wàkamba... Paanyimà pàà bânà bàà Izàlèlèlà bamanè kwamba nè: “Nzambi kàakulukù kàbìdì to; tudi baswè bwà Mòsa kwakulayè neetù.”

48 Yèyè nè: “Ncyàkwakulaku kàbìdì naabò mùshindù awu to, kadi Nèmbàtùminè Mupròfeta.”

49 Mu Dutèlònòrà 18.15, yèyè wàkamba nè: “Mukalenge Nzambi webè neàjuule Mupròfeta mufwànàngàne naanyi.” Nè pa nànkù Mufundu awu kawèna mwà kunyangakajiibwa to, byàkakèngela bwà kulwaYè bu Mwànà wa muntu. Mpindyewu aci ciwà mbwà cikondo Cyèndè, pàvwàYe pa buloba apa.

50 Pashìishe pàakafwàYe, kubìika ku lufù, kubànda, nènku wàkaaluja Nyumà Mwimpè, ùvwà m’Mwànà wa Nzambi. Nzambi ùdì Nyumà, nè mu Cikondo cyà Èkèleeziyà yèyè ùdì Mwànà wa Nzambi.

51 Nè pashìishe mu Bukalenge bwà bidimu cinunu, m’Mwànà wa Davidi, musòmbe pa nkwasà wa butùmbi, ùkòòkesha. Yèyè wàkabànda. “Ewu udi uciwuna neàsòmbè Naanyi pa nkwasà Wanyì wa butùmbi, Mùndi mucimùne, nè musòmbe pa nkwasà wa butùmbi wa Taatù Wanyì.” Yèyè mmusòmbe pa nkwasà wa butùmbi wa Taatù mpindyewu. Kàdi mu Bukalenge bwà bidimu cinunu, Yèyè udi musòmbe pa nkwasà Wendè Yèyè mwinè wa butùmbi, bwalu Yèyè ùdì Mwànà wa Davidi.

52 Yèyè ùdì Mwànà wa muntu, Mwànà wa Nzambi, Mwànà wa Davidi. Nwamònu’s, mbipwàngàne ànu menemene.

53 Mpindyewu tudi tujandula nè, bìvwà bìkèngela bwà kulwaYè bu mupròfeta. Dibènga kushintuluka dyà Dìyì Dyèndè’s! Nzambi kàtu ùshintuluka nànsha. Nzambi kàtu ùshintuluka to, bwalu Yèyè ùvwà Mupròfeta uvwa munda mwà Yòzefù awu. Yèyè ùvwà Mupròfeta, Ùvwà Nzambi mu Yòzefù. Ùvwà Nzambi mu Davidi.

54 Tàngilàayi Yòzefù, wàkaleeja nsòmbelu wa Kilistò mu mùshindù wàmba kwikala ànu mupwàngàne, kàdi wàkenza cilèma kampàndà, bwà kuleeja nè kàvwà n’Yèyè to. Muntu ùtu wènza bilèma. Nwamònu’s, wàkambila Pàlò, wàkamba... Wàkambila tatwèndè, uvwa mupròfeta awu, Yakòbò, yèyè nè: “Ambila Pàlò nè—nè twètù tudi balami bàà bimunà, bwalu mulami wa mikòòkò ncinyangu bwà mwena Èjiipitù.” Kàdi taatù, Nyumà kàvwà muswè kumulekela ùcyènza to; yèyè

wàkamba nè: “Basadidi bèèbè, mbalami bàà mikòòkò.” Pa nànkù nudi numòna Yòzefù mwaba awu wènta cilèmà.

⁵⁵ Davidì, muntu munène awu, wàkenza cilèmà. Muntu wa pa mwoyi wà Nzambi Sungasunga, kàdi wàkangata Bathshèbà, wèla meeji nè ùvwa mwà kusokoka Nzambi mwinè uvwayè mukwàcile mudimu awu, matùkù èndè ònsò à mwoyi, kàdi Nzambi wàkamwela patòòke kùdi Natàna mupròfeta. Nwamònu anyi?

⁵⁶ Kàdi nànsha nànkù tàngilàayi Davidì pàvwàye ùpàtuka, mupàtula mu cisàmbà cyèndè sungasunga, mfùmù mubèngiibwe. Mwanèndè sungasunga wa bakàji ùvwa munyangila buumùntù kùdi mwanààbò wa balùme, nè bàna bààbò bàà balùme bakwàbò bàvwa bamushipè. Nènku's ke yèyè ewu, Àbaashàlòmà ùvwa mujuuke nè mutàpùlùle cilwilu, mwenzèje dibìnduluka; nènku Davidì, tatwèndè mumuledi, wàkiipaciibwa, kuumushiibwa, wàkabèngiibwa kùdi cisàmbà cyèndè. Kuyayè pambèlu pàà cimenga, kakwàcìkwètù kenze bu kacibùkile panshi kènda kàdikòka panshi mwaba awu, kàmwelulwila, nè kàmutwila matè. Mulami awu kutuula mwelè wèndè wà mvità, wàmba nè: “Nèndekele kabwà kàka nè mutù kunshingù, kiikàle kàtwila mfùmù wanyì matè anyi?”

Davidì kwamba nè: “Mulekèle. Nzambi mmùmwbàmbila bwà kwenza nànkù.”

⁵⁷ Kakùyì mpatà to, Davidì kàvwa mumanyè cìvwàye wènta aci to; kubàndayè pa Mukùnà wùmfwèwùmfwè wà Olèv àwu kuntwaku, nè kutàngilayè panshi, ùdila mwadi, mfùmù mubèngiibwe. Pààbi, ndambù wa nkàmà yà bidimu paanyimà pàà cyòci aci, Yesù Kilistò wàkasòmba pa mukùnà wùmfwèwùmfwè awu, Mwànà wa Davidì, ùdila mwadi bu mfùmù mubèngiibwe, nè bààkaMutwila pèndè matè.

⁵⁸ Nudi numòna's, bintu byònsò ebi bìvwa ànu bìleeja Kilistò. Yèyè ùvwa citùpà cyà ku byòbi. Nzambi kàtu ùshintuluka nànsha. Ngiikàdilù Wendè kàtu ushintuluka to. Ngenzèlù Wendè kàtu ùshintuluka to. Yèyè ùcidi ànu Dîyì, nwamònu's, nè Maalàki 3.6 ùdi ùjaadika cyòci aci. Ùdi ùshintulula ànu mmwènekèlu Wendè bwà cikondo nè cikondo cyònsò. Cikondo nè cikondo cyònsò, Yèyè ùdi nè citùpà cyà Dîyì dyabanya divwà dyambiibwe mu cipròfeta nè nedyènzekè mu matùkù kampàndà. Èè, pàdi cikondo aci cilwa apu, Nzambi ùdi ànu ùkwàta mudimu mu mmwènekèlu mukwàbò. Nwamònu's, n'Nzambi dibà dyònsò, Dîyì adi: “Dîyì dyàkavwijiibwa mubidi nè dyàkasòmbela munkaci mwètù.”

⁵⁹ Mpindyewu mu Ebèlù 4, tudi tusangana, Ebèlù 4.12. Yesù wàkamanyishiibwa ànu menemene ku byenzedi Byèndè nè byàkenzàYe abi, bwalu Ebèlù 4.12 ùdi wàmba, nè: “Dîyì dyà Nzambi nditwè kutàmba mwelè wà mvità wà nseke yibìdi. Didi kàbidi dijinguludi dyà meeji nè mapàngadika à mu mwoyi.”

60 Ke mùshindù wùvwà Abraham, pàakatwilanganà Muntu ewu nendè, nè lupwishi ku bilàmbà Byèndè, nè tudi tusangana nè, pàakamònà Abraham Muntu ewu, wàkaMubiikila ku luseke.

61 Bàbìdì bàà kùdìbo bàakapweka è kubwela mu Sodomà; cimfwànyì cilenga cyà ditùkù ditùdìmu nè mwoyi edi, nènku tudi tusangana Billy Graham wa cyena leelù nè bakwàbò abu mu Sodomà, bàbàpàtula.

62 Tàngilàayi èkèleeziyà musungula awu, nànsha nànkù, dimiinu dilelèlè dyà Abraham. Lotà ùvwa mwànà wa mwanàabò, kàdi Abraham... Muntu ewu kàakapwekakù to, Yèyè wàkayiikila nè Abraham awu. Nènku ànu pàakaakulàYe nè Abraham apu, Wàkamba nè: “Abraham.” Mpindyewu vùlukàayi nè, dinà dyèndè divwa *Abram*, ndambù wa matùkù kumpàlà kwà cyòci aci, nè mukàjèndè ùvwa *Sarai*, kì n’Sarah to.

Ke Yèyè nè: “Abraham, mukàjèèbè Sarah, ùdi penyì?”

Yèyè nè: “Ùdi mu ntentà, paanyimà Pèèbè apu.”

63 Yèyè nè: “Nènkumwènèkèlè bilondèshile cikondo cyà mwoyi.”

Kàdi Sarah, munda mwà mwoyi wèndè, kwenzayè bu wacisekì.

64 “Nènku Muntu awu, nè nyimà Wendè mukoma ku ntentà,” mùdì Bible mwàmbè, “yèyè nè: ‘Sarah wàsekì bwà cinyi?’ mu ntentà paanyimà Pèndè apu.”

65 Ke Abraham kubiikilayè Muntu awu nè “Elohim.” *Elohim* mbwena kwamba nè “ewu Udiku nkàayèndè.”

66 Mpindyewu mwàkù wà mu Anglais *nzambi* wùdi wùmvwija cintu kampàndà. Myàkù yà mu Anglais ayi, bikèngela nùytàbàlèlèlè, bwalu yìdi nè mmwèneni minyangakaja yà mishindù yònsò. Nzambi kampàndà, cibàsa eci cidi mwà kwikala nzambi, mucì wùdi mwà kwikala nzambi, muntu ùdi mwà kwikala nzambi, cintu kanà cyònsò nzambi, ke cidi mwàkù wà mu Anglais nzambi awu ùmvwija’s.

67 Kàdi *Elohim* mbwena kwamba nè “Udiku nkàayèndè.” Kùdi ànu mwà... Cibàsa eci kacýèna ciikalakù nkàayaci to. Muntu kèna wikalakù nkàayèndè to. Mucì kawèna wikalakù nkàayawù to. Kàdi Elohim ùdi wikalà Nkàayèndè! Kampàndà Udi Wikalakù nkàayèndè, mumwènèshìibwe mu mubidi, mwimanè mwaba awu, ùdya, ùnwa mabèèlè à ngombe, ùdya munyiinyi, kànà kàà ngombe, ùdya dyàmpà, nè ùyiikila nè Abraham. Ke Abraham kwamba nè ùvwa “Elohim.”

68 Nènku Yesù, mu Luukà Munsantu 17, mmwàmbè nè: “Ànu mwàkadibi mu matùkù à Sodomà amu, kì mwikalàbì kàbìdì piikalàku ku dyalukila, piikalà Mwànà wa muntu nè cyà kumwèneshiibwa.” Mpindyewu, kì m’Mwànà wa Nzambi to; “Mwànà wa muntu neàmwèneshiibwè”! “PàdiYe munkaci mwà kubuuludiibwa, ùmanyishiibwa kùdi Èkèleeziyà Wendè, Mwànà

wa muntu neabuuludiibwè ànu kumpàlà menemene kwà Mwânà mulaya.”

⁶⁹ Abraham ùkaavwa mumònèmòne Nzambì mu mmwènekèlu yàbùngì mishiilèshiiilàngàne, mu Bukènkè kampàndà, nè mu bikèèna-kumòna; kàdi ke Nzambì ewu mu Muntu, ànu kumpàlà menemene nè mwânà wa balùme mwindila nè mulaya awu kumwènekayè.

⁷⁰ Yesù wàkamba nè: “Kumpàlà kwà Mwânà mulaya awu kwalukilayè cyàkàbìdì, Elohim ùvwa mwà kuDìvwija (Dìyì Dyèndè) mumwènèshiiibwe mu mubidi, Nzambì’s!”

“Bakalenge, tudi baswè kumòna Yesù!”

⁷¹ Nzambì mumwènèshiiibwe umweèumwè awu mu bikondo byònsò, ke mùtùbì misangu yònsò, Yèyè mmuDisokòke paanyimà pàà mubidi wà buntu. N’Nzambì munda mwèbè. “Mu katancì kakesè emu bàà pa buloba kabààkuMmòna kàbìdì to, kàdi nwènù nenùMmònè. Nèngiikalè neenù.” Yèyè ùdi mene munda mwètù; Yèyè neikalè, too nè ku dikumbana dyà maalù ònsò, too nè pàdìYe ùbuuludiibwa mu mmwènekèlu wa ùfùmina mu Dyulu.

⁷² Dìyì dyà Nzambì dyà cikondo eci, cyàkalayàYe bwà cikondo eci ncinyì? Wèwè mutàngile mu Bible nè mumòne cìdì cilayiiibwe bwà cikondo eci, nè umòna Aci ciikàle nè mwoyi, Udi wamba nè nCilelèlè anyi ncyà mafi nànsha mwikàle nganyì, Ncilelèlè bwalu Cìdì n’Nzambì umvwija Dìyì Dyèndè Yèyè mwinè.

⁷³ Kabyèna bikèngela bwà muntu nànsha umwe kwambayè nè: “Èè, matùkù awu àkaadi mamanè kupita. Cintu pààcì nè ndyondopa dyà kùdì Nzambì kacitukù to. Nè byònsò abi ndikolesha dyà maalù.” Mbyà—mbyà mafi’s! Pàdì Nzambì wamba nè Yèyè neàcyènzè mu cikondo kampàndà, Yèyè neàcyènzè. Kàdi bwalu bùdiku mbwà nè, tuvwa tubwela mu mmwènekèlu wa cintu kampàndà kale wàwa, cilongelu kampàndà cinène, kàdi tudi baCipangile.

⁷⁴ Ke bwà cinyì bààkapangila Yesù pààkalwàYe. Bòbò bàcìvwa ànu bàteeta kwikala nè mwoyi ku Mikenji, pàvwà Bible mwàmbe bitòoke tòò... Apa mene, mèmè nènCibalè, Yèyè kwamba nè: “Kenketaayi Mifundu, mu Yòyi amu mmunùdì nwela meejì nè nudi nè Mwoyi wà Cyendèlèlèlè, kàdi Yòyi ayi’s ke Yìdì yimfidila Mèmè bujaadiki. Piikalà Mifundu kayiyì yimfidila bujaadiki to, dībà adi ncyà mafi.” Ncyà bushùwà nè bàvwa mwà kwikala bamòne virgò awu mufwànyine kwimita difù! Ncyà bushùwà nè Yèyè nguvwa dyandamuna dipwàngàne bwà Mifundu! Twètù beena Kilistò tudi twitabuuja aci mpindyewu.

⁷⁵ Kàdi bìvwa bifwànyine kwikala nè dikwàcisha kaayì kùdì Mòsà bwà kulwa nè ditùkù dyà Noà, mukenji wà Noà? Bìvwa bifwànyine kwikala nè dikwacisha kaayì kùdì Yone Mubatiiji bwà kulwa nè mukenji wa Mòsà? Nwamònu anyì?

⁷⁶ Katwèna nè mukenji wà Sankey to. Katwèna nè mukenji wà Moody to. Tudi nè Mukenji wà dībà edi! Katwèna nè mukenji wà Luther anyi wà Wesley to. Yìvwa ànu mîmpè, kàdi edi nditùkù dikwàbò. Eci mmulayi mukwàbò. Eci ncikondo cikwàbò cyà Èkèleeziyà. “Yesù Kilistò umwèumwè awu makèèlèlè, leelù, too nè kashidi!” Mùshindù mwinè wùdìbi byà bikemesha’s, mùshindù mwinè wùdì bantu mwà kulwa bafòfò’s wè, mu cikondo, kàdi bìdi bikèngela kwikalabi mùshindù awu. “Bàà civùmvù,” mu eci cikondo, mùdi Bible mwambè, “nè nebàtwidiibwè mukana Mwèndè,” mu Cikondo cyà Èkèleeziyà wa Laòdikiyà eci. “Kàdi bònsò bàdìYe munangè abu, Yèyè ùdi ùbànyooka nè ùbàtandisha.” Wàkamba nè bìvwa mwà kwikala mùshindù ewu mu Cikondo cyà Èkèleeziyà wa Laòdikiyà eci.

⁷⁷ Vùlukàayi nè, Nzambi ùtu ùshintulula mmwènekèlu Wendè. *En morphe*, mwàkù wa cyena Ngelikà wùdi wùmvwija nè Yèyè ùtu ùlwàta cibwikilu cyà kwisù cishilàngàne. Byenze bu mu *Carmen* anyi cintu kampàndà, anyi—anyi mu manàyi à Shakespeare, Yèyè ùdi—Yèyè ùdi bu mwenji wa dinàya, Ùdi ùshintulula mmwènekèlu Wendè. Byònsò bìvwa baprófètà abu abi, ùvwa n’Nzambi mu baprófètà abu. Yesù ngwàkamba nànkù nè: “Nwènu’s nudi nubàbiikila nè ‘mbanzambi,’ aba bàvwà Dìyi dyà Nzambi dilwa kùdìbo: kàdi’s ke Mémè ewu, Mwànà wa Nzambi, mmunyi munùdi nuMpiisha?” Kaa, ekèlekèle!

⁷⁸ Cintu cìmwècìmwè aci cidìku leelù ewu, n’Nzambi mumwènèshìibwe mu mubidi, Mukenji wà dībà edi, Bukènkè bwà ditùkù! Katwèna mwà kwikala nè mikenji mikwàbò yà kale ayi to, yìkaadi mimanè kutèèkiibwa mu cyenzedi; tudi nè mwoyi mu dibàlakana dyà bukènkè.

⁷⁹ Ke dibànzà ditàmbe bunène ndyòdì adi, bwìvì butàmbe bunène, bütùku matùnga mamanyè kacya, bwàkenjiibwa mu Angleterre ànu àbìdì àdì panshi aa, bwenza kùdì makènkè à mafi. Bwà ndola mìliyò mwandamutekète, bwìvì bwà ku kàwulù, kabùvwakù bwànji kumanyika kumpàlà, mu maalù-malonda. Aci’s cìvwa dibànzà dinène, cintu cinène bwà cikondo cyà beena lwonji mu buloba emu.

⁸⁰ Nè cintu citàmbe bunène cyà beena lwonji mu cikondo, mu buloba mutùdi basòmbèle nè mwoyi ebu, m’bukènkè bwà mashimi mu dībà ditùdì nè mwoyi edi, buteeta kutwaluja mwínshì mwà twitabàayi wa mùshindù kampàndà nè bikwàbò. Pààbì, twètù tudi mikàndà mifùndilangana yidi nè mwoyi, anyi, mu ngaakwilù mukwàbò nè, tudi mikàndà mifùndilangana yidi nè mwoyi, yidi mifùnda kàdi mpindyewu miikàle nè mwoyi ku Dìyi dyà Nzambi, ànu mwàkalayàYe mu dībà edi amu; Dìyi dimwènèshìibwe, mikàndà mifùndilangana, yidi nè mwoyi ku bantu. Ke cyàkadì bàpostòlò aci.

⁸¹ Ke cyàkadì Yone Mubàtiiji aci. “Yèyè ùvwa dìyi dyà ewu uvwa wela lubilà mu cipèèlà.” Wàkateeta bwà kubàmbila

nànkù. Yèyè's ùvwa kàbìdì Malàkì 3 nè: "Mònaayi, Ndi ntuma mùsànjeelà Wanyì kumpàlà Kwànyì, bwà kulongolola njila kumpàlà kwà bantu." Yèyè ùvwa Dìyì dìdì nè mwoyi adi.

⁸² Nè Èkèleeziyà mulelèlè mulediibwe cyàkàbìdì mu dìbà edi n'Dìyì dìdì nè mwoyi dyà Nzambì. N'Dìyì dyà cikondo eci, dimwèneshiibwe. Kenkètaayi Mifundu bwà nùmonè cìdì nè cyà kwikala mu eci cikondo. Ke Kilistò udi cyàkàbìdì nè mwoyi awu, mwikàle ànu ùshintulula cibwikilu Cyèndè cyà kwisù ùmuka ku eci ùya ku cikwàbò.

⁸³ Mpindyewu, Yèyè wàkamanyishiibwa ànu menemene bu Maasiyà. Bìvwa bikèngela kwikalabò bacìmanyè. Tudi bamanyè cìvwa Maasiyà nè cyà kwikala. Ùvwa nè cyà kwikala Mupròfètà. Ke cìdì Bible mwambè nè ke cìvwaYe ncyòcì aci. Ke cyàkambàYe nè ke cìvwaYe ncyòcì aci. "Mémè Mwànà wa muntu ndi Nganyì?" Ùdi misangu yònsò ànu ùDìmanyisha bu cikondo cyà Mupròfètà, ùDìmanyisha bu Mupròfètà wa Nzambì. Ke cìvwaYe ncyòcì aci.

⁸⁴ Kàdì Yèyè ùvwa mutàmbe nè mupròfètà. Ùvwa Mupròfètà-Nzambì awu. Cìvwa Davidì aci, cìvwa Mòsà, cìvwa Eliyà, cìvwa cyònsò aci, "munda Mwèndè mùvwa musòmbèle kaabujimà kàà Bunzambì mu ciikadilu cyà mubidi." Yèyè ùvwa Mupròfètà-Nzambì. Yèyè ùvwa Nzambì, Yèhowàh, wàkalwa mubidi mu Mwan'Èndè Sungasunga, wàkaDijuudila tabernacle bwà kuDìmwèneshamù. Bakwàbò bònsò abu bààkapangila, bàvwa nè bilèmà; kàdì kakwènakù cilèma mu Yèyè to. Nànsha Nzambì Yèyè mwinè wàkamba nè: "Ewu m'Mwan'Àanyì munanga mwena munda mùNdi nsànkila bwà kusòmbela." Ncyà bushùwà, kakwèna cilèmà nànsha cìmwè munda Mwèndè to. "Mutèlèjaayi Yèyè!" Yèyè wàkamwèneshiibwa Nzambì.

⁸⁵ Bààkamba nè: "Udi uDìwija Wèwè mwinè Nzambì, anyì mùmwè nè Nzambì." Ke cìvwaYe. Ùvwa Mwan'Èndè Sungasunga. Amen. Yèyè ùvwa nè...Yèyè ùvwa dimwèneshiibwa dyà Nzambì. Nzambì ùvwa munda mwà Kilistò, ùpungisha bàà pa buloba nè Yèyè mwinè.

⁸⁶ Nènkù mu ditùkù dyà ndekeelu edi, Yèyè ùdi wàkwila nè bantu ku Mwan'Èndè, Kilistò Yesù, ùDìmanyisha. Dìbà adi Kilistò ùdi cinyì? Dìyì. Dìyì dyà cinyì? Dìyì dyà Mòsà? Èyowà's, kàdì leelù ewu Yèyè ùdi Dìyì dimwèneshiibwe bwà ditùkù edi.

⁸⁷ Mònaayi mwàkadi Yesù. Mpindyewu, Ùdi nè cyà kwikala Mupròfètà, tùmònaàyiibi Yèyè ní ùvwa nè cimanyinu cyà Maasiyà. Tùyaayi ku Yone Munsantu, nshapità 1, bwà tusunsa tùtaanu, dikùmi tùdì tùlondà etu, kumpàlà kwà twètù kujikija. Yone Munsantu 1, tudi tuMumòna ùlwa pa buloba. Ùvwa mulediibwe kùdì virgò, ànu cìdì Bible mwambè aci. Wàkìmicìibwa mu difù dyà virgò.

⁸⁸ Kì nnè virgò awu ùvwa nzambì mukàjì mpindyewu to, yèyè...Wèwè udi wamba nè: "Kàdì bishi bwà Màriyà?" Yèyè

kàvwa mupwàngàne to. Yèyè ùvwa mukàjì, ànu muntu mukàjì kanà yònsò ewu bu mukàjì kanà yònsò ewu, kí n'nzambi mukàjì to; muntu mukàjì. Muntu kampàndà kwambayè nè: “Kwênàku umvwa bundù bwà kwamba nànkú anyì?” To, mukalenge!

⁸⁹ Tàngilàayi kunweku. Mpenyi pàdiye mwenzèle cilemà? Mòna's, kàdi's ke yèyè ewu mwenzè cìmwèpelè. Pàakayàbo ku difestò dyà Mpenta, nè bantu bààkenza lwendu lwà matùkù àsàtù; kàdi kubèngabò kuMumòna, baledi Bèndè's, ki kwalukilabò bwà kuMupeta. Ke kuMusanganabò mu Mifundu, ùkòkelanganaPu nè baakwidi mu ntempèlù. Kàdi tàngilàayi cyàkambà Màriyà, ànu mwaba awu kumpàlà kwà baakwidi abu, badyudi abu. Yèyè nè: “Tatwèbè nè mèmè's tudi baKukèbe, nè binsonji.”

⁹⁰ Kàdi Díyì dítu misangu yònsò ànu dìlongolola cilèmà. Yèyè ùvwa Díyì, Mwànà wa balùme wa bidimu dikùmi nè bìbìdì. Lungènyì elu ndufùmìne penyi?

⁹¹ Vùlukàayi nè, ànu mwaba awu yèyè wàkavila bujaadiki bwèndè. Ùvwa mwambè nè Nzambi nguvwa Tatw'Èndè; kàdi ke yèyè ewu wàmba apa nè: “Tatwèbè nè mèmè, Yòzefù, tudi baKukèbe, nè binsonji.”

⁹² Yèyè kwamba nè: “Kwèna mumanyè nè ndi nè cyà kwikala mudifile ku maalu à Taatù Wanyì anyì?” Nwamònu anyì? Nwamònu anyì? Bu nè Yèyè ùvwa nè tatw'Èndè, Yòzefù, Yòzefù bu nè nguvwa tatw'Èndè, nùnkú's Ùvwa kwikala munkaci mwà dyenza biibi byà tubàdi nè bikwàbò. Nwamònu anyì? Kàdi Yèyè ùvwa mudifile ku maalu à Tatw'Èndè, ùlongolola Díyì bwà dítùkù adi. Yèyè ùvwa Díyì. Amen. Nwamònu's, Màriyà wàkenza cilèmà, kàdi kakwènakù bilèmà byàkenzàye Yèyè to. Yèyè nguvwa Mupwàngàne awu.

⁹³ Mònaayi, pààkalediibwàYe, wàkakoleshiibwa, kubàtijiibwa kùdì Yone, Nyumà Mwímpè kuMutùlùkila pambidi, kuya mu cipèèlà, kupàtuka, mudimu Wèndè wà bwambi kubangawù, dyondopa. Kùvwa muntu dyèndè Simonà, ke kulwayè nè mwanaàbò wa balùme, Andèlè, mu disangisha kampàndà.

⁹⁴ Mpindyewu tèèlejàayi nè ntèmà yònsò mpindyewu, netùjikijè—netùjikijè, bwà kumòna cìvwàYe musangu awu. Nènku piikalàbi nè Yèyè wàkaakula nè baataatù kùdì bapròfetà, mu matùkù à ndekeelu aa ku Mwan'Èndè, kumòna ànu cìdì Nzambi leelù ewu aci, kumòna nè Yèyè ní mmumanyishiibwe mùshindù wùmwèwùmwè awu.

⁹⁵ Yèyè wàkaDìmanyisha bìshi? Wàkatùlùka nè kwamba nè: “Mpindyewu nkàadi mupicile mu cìlongelu aci. Ndi nè dipòlomè dyànyì dyà Licencié, Ph.D., LL., nè bikwàbò. Ndi mudìlongòlòle bwà mudimu Wànyì wà bwambi anyì?” To, mukalenge. Yèyè kàakacyènza to. Wàkaya mu cipèèlà, mwàkenzà Yone amu, wàkapàtuka mulaaba kùdì Nyumà Mwímpè.

96 Tàngilàayi nùmonè mwàkaDimanyishàYe pààkatwàdijàYe kuyiisha. Kùvwa muntu mulùme, Andèlè, uvwa munkaci mwà kutèèleja Yone, kuyayè nè Yesù bwà kujandula mwaba wùvwàYe ùsanganyibwa, kuMulondaye too nè ku disangisha adi; kulwa nè mwanààbò wa balùme, Simonà. Simonà mmwenzè ànu ùbwela mu Bwikadi bwà Yesù anyi, Yesù kwamba nè: “Dîna dyèbè n’Simonà, nè udi Mwànà wa Yona.” Aci cyàkaMumanyisha. Ànu mwaba awu mene dîna dyà Peetèlò dyàkashintuludiibwa kuumuka ku Simonà kulwadi Peetèlò, cidi cyùmvwija nè “dibwe dikesè,” nè kulwayè mulombodi wa èkèleeziyà awu, pashiishe.

97 Pashiishe tudi tumòna muntu mwimàne mwaba awu, dîna dyèndè Filipò, kwambayè nè: “Mpindyewu anji indilà kakesè, katwèna bapetè mupròfeta to kùkaadi bidimu nkàmà yinaayi. Mupròfeta udi ulonda awu, tudi bamanyè cìdibi nè cyà kwikala.”

98 Nàнку ke pashiishe kuyayè mu nyungulukilu mwà mikùnà amu, mu ntàntà wa kilòmèètà makùmi àbìdì nè yinaayi, bu nwènù kuntwaku bwà kupima ntàntà wa mwaba awu, kwàkasanganàye mulundà kampàndà uvwabo bàlonga nendè màleesònà à Bible pàmwe. Yèyè ùvwa muntu wa lulamatù lwà menemene, muntu mushidimùke wa kapelu. Dîna dyèndè ùvwa Natànàèlà. Pa nàнку kakùyì mpatà to, wènda ùbànda ku ciibi bwà kusangana nè kàvwa ànu ku nzùbu kwèndè to, ùvwa mufwànyine kwikala mukàjèndè wákamba nè: “Ùdi pambèlu mu budimi bwèndè bwà micì yà olèvà amu, munkaci mwà kusambila.”

99 Pa nàнку Filipò, musalùke bikolè bwà civwàye mumòne cyenzèke, dimanyishiibwa dipwàngàne dyà Dutèlònòmà 18.15, Mupròfeta wàkajuuka! Ke kuyayè, katuutakeena nè Natànàèlà, nè kwamba nè: “Natànàèlà, lwà, ùmonè Utùdì bapetè.” Kàvwa nè dîbà dyà kwakula pa mùvwà kuulu nè bikwàbò to. Mukenji wùvwa wà lukàsàlùkàsà. Mwoyi wèndè wùvwa wulàkuka kapyà. Aci’s ncututàmbe twètù mpindyewu, tudi nè bintu bikwàbò byàbùngì byà dyenza pa kuumusha *Eci*. Kàdi katanci aka anyi, yèyè nè: “Lwàkù, ùmonè Utùdì bapetè, Yesù wa mu Nazàlèètà, mwànà wa Yòzefù.”

100 Tùdibwinkàayi mu muyiiki wàbò pàvwàbo bènda balonda mwelelu wà mbù apu. Ndi mwà kuumvwa Filipò wàmbila Natànàèlà nè: “Udi mumanyè mulòbi wa kale awu kuntu kwàka, udi mumanyè anyi?”

101 “Kaa, mu—mu—mukùlumpe wàkafwà musangu kampàndà awu awu, Yona?”

“To, to. Mwanèndè wa balùme, Simonà.”

102 “Èyowà’s, èyowà. Kaa, ndi mvùluka mùmvwà nsùmba mishipa kùdiye. Èè, kàdi bìshi bwèndè yèyè? Èè, kí mmulonge kàlaasà kakùmbàne bwà kufùndaye dîna dyèndè to. Kàvwa mwà kutwà cyàlà pa reçu wanyì to.” (Bible mmwàmbè nè yèyè ùvwa mupangi nè kàyì mulongè kàlaasà to, kàdi bàakamòna nè ùvwa

nè Yesù; pa nànkú tudi tusangana nè kàvwa nànsha mwà kutwà cyàlà pa reçu to.)

¹⁰³ Yèyè nè: “Èyo,” yèyè nè, “udi mumanyè mùdì bwalu anyi? Pààkabwelàye buludì mu bwikadi bwà Muntu ewu, Muntu awu kàyi mumumanyè to, kumwambilayè nè dìnà dyèndè ùvwa ‘Simona, mwànà wa Yona.’” Yèyè nè: “Awu kî m’Maasiyà awu anyi? Awu kî mmupròfeta anyi? Aci kî n’Dutèlònòmà 18, Mifundu myûle anyi? Kenkèta nsòmbelu Wèndè; tudi nè mwoyi mu ditùkù kaayi? Tudi nè mwoyi, bindile Maasiyà ulwàlwa awu. Twètù beena Ebèlù bònsò tudi bindilè’s. Kî mmwòmò anyi?”

¹⁰⁴ “Aa, mpindyewu anji indilà kakesè,” mwàkambà Natànàèlà, “nebikèngelè bwà mèmè kujandula.”

“Èè, kabyàkumbazulakù to bu Yèyè mwà mukumanyè.”

¹⁰⁵ “Huh-uh-uh, ngānji ncimònèbi. Ndekèlaayi nye ku dimwè dyà ku masangisha bwà ncimòne cyenzèke.”

¹⁰⁶ Èyo, ùdì ùbànda buludì mu disangisha mùdì Yesù mwimàne amu. Yèyè nè: “Mònaayi mwena Izàlèèlà, mwena munda mùdì kamùyi budimù!”

Yèyè nè: “Laabi, Wèwè utu mummanyè díbà kaayi?”

¹⁰⁷ Yèyè kwamba nè: “Kumpàlà kwà Filipò kukubiikilayè, paùvwa mwínshì mwà mucì apu, Mèmè mvwa mukumòne.” Cìvwa ncyòci aci. Cìvwa ncyòci aci.

¹⁰⁸ Ncinyi aci? “Yesù Kilistò umwèumwè awu makèèlèlà, leelù, too nè kashidi.” Nwamònu’s, Yèyè wàkaDimanyisha, bu Díyi.

¹⁰⁹ Mubadi ewu wàkamba cinyi? “Laabi, Wèwè udi Mwànà wa Nzambi. Wèwè udi Mfùmù wa Izàlèèlà.”

¹¹⁰ Kàdì kùvwa bàmwè bàà ku bôbò abu biimàne mwaba awu, bàvwa kabàyi biitabùùje aci to. Bààkamba nè: “Muntu ewu m’Beelèzèbùlà.”

¹¹¹ Yesù wàkamba nè: “Ndi nnùfwila luse bwà bwalu abu, nubiikila Nyumà wa Nzambi nè ‘ncintu cikooyike,’” bwalu difuta dyà cibawu kadìvwa dyenjìibwe to. “Kàdì pàdì Nyumà Mwîmpè, Yèyè Nyumà Mwîmpè awu...” Yèyè mmupinganyi muleeji muntu; pàdì, kî mmeeji kampàndà to; Muntu! “Piikalà Yèyè Nyumà Mwîmpè mulwè bwà kwenza cintu cìmwècìmwè aci, díyi dimwèpelè díbì bwèndè Yèyè kadyàkufwidiibwakù luse to.” Vùlukaayi nè, Yèyè udi umwèumwè awu makèèlèlà, leelù, too nè kashidi, Díyi dimanyìshìibwe divwijiibwe mubidi. Pashiishe tudi tuMusangana mwaba awu, mpindyewu, abu bàvwa mbeena Yudà.

¹¹² Kùdì bisà ànu bisàtù byà bantu. Tudi mwà kwikala nè disungulujangana dyètù nè—nè diitabangana, nè cyònsò cinùdì baswè aci, ndi...kî ncidì cisànkisha to. Mèmè ndi musadidi wa Kilistò, nkwàcila muntu yònsò mudimu. Kàdì, tèèlejàayi,

lekèlaayi nwwámblè. Tàngilàayi kunweku. Kùvwa mwena Yudà, wa bàà Bisàmbà byà bendè, nè mwena Sàmaalèyà.

¹¹³ Nènkù tàngilàayi Èvànjeeliyò, twakula bwà Peetèlò nè nsapì. Wàkakàngula naayi mu Ditùkù dyà Mpenta, bwà beena Yudà. Filipò wàkapweka nè kubàtiizayè beena Sàmaalèyà, nè kwipatayè baadémons, Nyumà Mwímpè kàvwa mulwè pambidi pààbò to; Peetèlò wàkalwa nè kubàtentekelayè byanza, kupetabò Nyumà Mwímpè. Nènkù ku nzùbu wa Kòneeliyò, bàà Bisàmbà byà bendè bààkaMupeta.

¹¹⁴ Mpindyewu, bàà Bisàmbà byà bendè, twètù bàà Bisàmbà byà bendè, twètù ba-Anglo-Saxons aba, katùvwakù nànsha bindile Maasiyà to; tuvwa bampàngaanù, nè bibwenga paanyimà pèètù, tuvwa tokuukwila mpìngù. Kàdi bònso bàbìdi beena Yudà nè beena Sàmaalèyà bàvwa bindile Maasiyà.

¹¹⁵ Nè Yèyè ùdi ùlwa ànu kùdì aba bàdi baMwindile. Lamàayi aci mu meeji mu disangisha edi, Yèyè nèàtwilanganè ànu nè aba bàdi baMwindile!

¹¹⁶ Ndekeelu wa byònsò, díbà adi Ùdi dijinga...ùvwa ùya ku Yelèkò dīngà ditùkù, kàdi ùvwa nè dijinga dyà kupìcila ku Sàmaalèyà, aci's mmu mikùnà mwàmwa. Wàkapweka too nè ku mwaba...Mpindyewu, tudi tuMumòna ùDimanyisha bu Maasiyà, ùleeja cimanyinu Cyèndè cyà Maasiyà, nènkù bààkacipenda. Pa nànkù bìdi bìkèngela bwà Yèyè kupìcila ku Sàmaalèyà, bàvwa bindile Maasiyà, bóbò pààbò. Pa nànkù Yèyè kulwa mu cimenga cidìbo bàbiikila nè Suukà, lwà pa díbà dikùmi nè ibìdi jaajaaja.

¹¹⁷ Ciinà cyà mâyì, cìcìdi ànukù, bàvwa ànu bàsòmbe ku luseke lwàcì aku, ànu pambèlù pàà ciibi cyà cimenga. Mwaba awu, mpompì wa mâyì wa bantu bònso, bantu bònso bàtu bàlwa bwà kusuna mâyì àbò; kí mpompì to, bàvwa ànu bàcìpwekesha nè ngoobolu nè bàkòkamù mâyì. Nènkù bàvwa nè mpànzà minène ayì, bàcìdi bàcyèenza leelù ewu. Kàdi nwènù bàdi bàmba bwà dyenda musulàme, bàmwè bàà ku nwènù bakàji bàdi bènda nè mikàndà pa mitù yènù abu? S'bìvwa bìkèngela bwà nwènù kumòna mùdi bakàji abu mwà kutèeka nyingu wa litres makùmi àbìdi pa mutù, nè mukwàbò ku lubèsè nè ku lubèsè; kàdi kwenda ànu naabi, ùyiikila, nè mucilekèlèle ànu bímpè menemene.

¹¹⁸ Nènkù kupwekayè, lwà pa díbà dikùmi nè umwe jaajaaja mu ditùkù, pàakafikàbo kuntwaku mu nkànkalà, kàdi kutùmaYè bayiidi mu cimenga bwà kusùmbabò bintu byà didyà.

¹¹⁹ Nènkù kùvwa mukàji kàmpàndà mu cimenga amu, wa luumù lubì, kàvwa mwanyishila bwà kwikala nè bakàji bakwàbò abu to, mu mùshindù wà nè wàkaya ku ciinà cyà mâyì aku bwà kupeta ndambù wa mâyì. Nènkù pàvwàye wàmba kutèeka nyingù wa mâyì paanshì, kutàngilayè kùdì Muntu mulùme musòmbe mweyèmene ku cimanu aku wàkaakula nendè, kwamba nè: "Mukàji, ntwàdìlèku mâyì à kunwà."

¹²⁰ Mpindyewu, bàvwa nè disungulujangana dyà menemene, beena Yudà nè—nè beena Sàmaalèyà. Nènku wàkaMumanyisha, nè lùkàsà lwònsò, nè—nè kacivwa cilèlè bwà Muntu wa mùshindù Wèndè awu kulòmba mukàji awu, mwena Sàmaalèyà, dyèsè kanà dyònsò edi to, bwalu beena Yudà nè beena Sàmaalèyà kabàvwakù nè njiyà yà muntu nè mukwèndè to, kabàvwa nè bintu byà mwomùmwe to. Yèyè nè: “Kàdi bu wèwè mumanyè nè Nganyì ùdi wakula nendè ewu, wèwè’s nguvwa mwà kuNdòmba màyi à kunwà, nènku mwwa mwà kukupeèsha màyi à kùyi ulwa apa bwà kusuna to.”

¹²¹ Cìvwàye wènta ncinyi? Munkaci mwà kulenga nyumà wa mukàji awu. Yèyè ùvwa mupròfetà. Nè dikòkangana divwa dyà nè anyi bìvwa bikèngela bwà kukuukwilabò mu Yelusàlè mà anyi ku mukùnà. Yèyè nè: “Taatu ùdi ùkèba aba bàakuukwilà mu Nyumà nè mu Bulelèlè.”

¹²² Nènku Wàkatungunuka too nè mwàkajandulàYe cìvwà lutàtù lwà mukàji awu. Wàkapweka ànu buludi too nè mwàkajandulàYe lutàtù lwèndè. Tudi bònsò bamanyè cìvwàci, bàdi bàbala Bible, Yone Munsantu 4. Twàsangànyì cinyi? Ùvwa nè balùme bapite bùngi. Yèyè nè: “Ndà kangàtè bàyeebè kàdi nùlwe mwab’ewu.”

Yèyè nè: “Ncìtu nè bàyaanyì to.”

Yèyè nè: “Wàmbi bulelèlè, bwalu ukààvwa naabò bàtaanu.”

¹²³ Tàngilàayi dishiilàngana bwà mukàji mutekète awu nè baakwidi abu mu ditùkù adi. Yèyè nè: “Mukalenge, ndi njingulula nè Wèwè ewu udi Mupròfetà. Mpindyewu katwèna bapetè nànsha umwe to kùkaadi bidimu nkàmà yìnaayi. Ndi njingulula nè Wèwè ewu udi Mupròfetà. Tudi bamanyè nè pààlwà Maasiyà, eci ke cintu cyènzàYe’s.” Ncyà bushùwà anyi? “Yèyè neàtùleejè maalù aa. Yèyè neàtwàmбилè cyòci eci.”

Yèyè nè: “Ndi Yèyè awu, udi wakula neebè ewu.”

¹²⁴ Ànu Muntu wetù wa pàtupù ewu musòmbe mwaba awu, ànu nè bidimu makùmi àsàtù cyanàànà; pàmwàpa ùmwèka bu nè makùmi àtaanu, bwalu bàvwa bambè ànu nànkù, mu Yone Munsantu 6 nè: “Wèwè udi Muntu wa bidimu kabìyi bipite pa makùmi àtaanu to, kàdi wamba m’Ùdi mumòne Abraham, mpindyewu tudi bamanyè nè Wèwè udi nè démon.”

Kàdi Yèyè wàkamba nè: “Kumpàlà kwà Abraham kwikalayèku, NDI.”

¹²⁵ Nènku, èyowà, ke Yèyè awu, nsongààlùme wa citende, pàmwàpa nè ndambù wa mvyà ku mwevu, mudimu Wèndè; mubidi Wèndè wa buntu wùvwa mutekètàngàne: “kàyi nè bwimpè butùdi mwà kuMujingila,” cisèbà cyà kale cyà kasengelanshimbà cyàkàbidi’s; kàdi cìvwà munda mwàci cìvwa n’Shekinàh, cìvwà munda mwàci cìvwa n’Nzambi. Nzambi’s! Cìvwa ncinyi? Ke Yèyè awu mumanyishìibwe, Díyi dyà Nzambi,

mumanyè munsokòntù wà mu mwoyi wàbò. Nwamònu's, aci cìvwa n'Dìyì dyà Nzambi. Yèyè ùvwa Dìyì dyà Nzambi.

¹²⁶ Nè Dìyì dyà Nzambi dīcidi ànu dyenza nànkù, bwalu Yèyè ùdi umwèumwè awu makèèlèlè, leelù, too nè kashidi. Nudi nuciſangana, nuciſangana mu meeji ènù mpindyewu anyi? Mònaayi nè: “umwèumwè awu makèèlèlè, leelù, too nè kashidi.”

¹²⁷ Kubwelayè lubilu mu cimenga, wàmba nè: “Lwâyì, kanùmonàâyì Muntu udi mungambile cīndi mwenzè. Kí n'Yèyè ewu Maasiyà mwinè awu anyi?”

¹²⁸ Piikalàbi nè cyôci aci cìvwa ncimanyinu cyà Maasiyà, kùdì beena Yudà nè kùdì. . . nè kùdì beena—beena Sàmaalèyà; nè Yèyè kéna ùsunguluja muntu to, umwèumwè awu makèèlèlè, leelù, too nè kashidi to; nènkù cyôci aci ke cìvwa ndekeelu, pààkiimanyikà Nzambi kukwàta mudimu nè beena Yudà nè beena Sàmaalèyà. Nè eci ke ndekeelu wa cipungu cyà bàà Bisàmbà byà bendè, pààkapiçilàYe mu balongolodi nè bikwàbò, too nè ku ndekeelu, nè kulaya nè: “Ànu mwàkadibi mu matùkù à Abraham amu, ke mwikalàbi kàbidi piikalà Mwànà wa muntu munkaci mwà kubuuludiibwa kùdì bàà Bisàmbà byà bendè mu ditùkù dyà ndekeelu.” Ùvwa mwà kwalukila cyàkàbidi.

¹²⁹ Byàbùngì be mbifwànyine kwambiibwa mwab'ewu, kàdi ndekelaayi ndwijakaje mpindyewu bwalu tukàadi—tukàadi dībà citèemà jaajaaja, ànu paanyimà ndambù. Netùpatukè pa dībà citèemà nè tusunsa makùmi àsàtù, bu Mukalenge mwà kwanyisha.

¹³⁰ Mònaayi nè, mupròfetà mmwambè, lwà mu Zekàâyì 14.6 nè: “Nekwikalè ditùkù diikalà kadiyi mwà kubiiikidiibwa nè mmundaamuunyà anyi mbufùkù to, kàdi nediiikalè ditùkù dyà dibungama; kàdi ku ibaamulòòlò, nekwikalè Bukènkè.” Mpindyewu tàngilàâyì, lùkàsàlùkàsà. Mufundu nànsha wùmwe kawèna mwà kunyangakajiibwakù to. Bikèngela wùlè wònsò.

¹³¹ Mpindyewu dībà dīdi dījuuka bishi? Dīdi dījuukila penyi? Ku Esètè. Dīdi dībwela penyi? Ku Wesètè. Dishidimuka ndyenzè lwendu pàmwe nè dībà, ke mùdi Èvànjeeliyò mwenzè pèndè. Nwacyūmvù anyi? Mpindyewu tudi baalùkile buludì ku Côte Ouest mpindyewu cyàkàbidi. Bu twètù mwà kutàmba kuya kule, tudi twalukila cyàkàbidi ku Esètè, tusambuka ànu luseke lwà Pacifique batàngile ku Esètè cyàkàbidi; cintu nànsha cīmwe muntwamu, nwamònu's. Mpindyewu dishidimuka ndyenzè lwendu pàmwe nè dībà.

¹³² Èvànjeeliyò mmusabùke màyi. Ncifùmìne ku—ku Mbù wa Méditerranée, nè kusàbukilamù, kwambwila ànu ku Pòlò Munsantu, citàngile ku Allemagne; kuumukila ku Allemagne, wàkasabuka njila wa beena Anglais, kuya ku Angleterre; kuumukila mu Angleterre, kusabukaci lwà mu Atlantique, citàngile ku États-Unis, kàdi mpindyewu cidi cyàlukila ku Pacifique.

133 Tàngilàayi, dībā dīm̀wè̀dīm̀wè̀ didi dìjuukà ku Esètè adi ndyòdi dībā dīm̀wè̀dīm̀wè̀ didi dikabwela ku Wesètè, d-ì-b-à. Nè Nyumà Mwímpè umwèumwè wákamata mu Ditùkù dyà Mpenta awu, mu Esètè. . . Mpindyewu civwa nditùkù òwà kadiyi mwà kwikala dibìikidibwe nè nditùkù to, ndyà dibungama, ditùkù dyà dibungama, dyà mvùla; nudi nucimòna mwaba ewu mu Kansas emu, dyà mvùla, dyà dibungama. Tudi bapetè bukènkè búngi bukùmbàne bwà—bwà kudìvwija bàà mu èkèleeziyà, nè bwà kwenza bintu ebi, bukènkè búngi bukùmbàne bwà kunyungulukilamù, kadi Yèyè wákamba nè: “Ku ibaaumulòlò, nekwikalè Bukènkè, Mwànà ùvwà mwà kwalukila cyàkàbìdi.” Nè Nyumà Mwímpè mwikalè wàlukila mu matùkù à ndekeelu aa nè kaabujimà cyàkàbìdi kàà bukolè bwà Nzambi, Diyì diikàle dīm̀wè̀nèshìibwe! Ku ba-Luthériens. . .

134 Nènkù ànu mùdi—mùdi cipaapu cyà musàkà cyènda cibànda. Ba-Luthérien, dilongolola dyà kumpàlà; Wesley; Mpenta; nè mpindyewu mwikalè musongelamù. Bwà nè, pàdi Dibwe dyà mùsongà dyàlukila ku cipaapu cyà musàkà, nebikengelè bwà kukùmbananganadi mùdi bikwàbò byònsò abi amu. Kanwèna nànsha mwà kupicishilamù keelè munkaci mwà mabwe amu to, mbipwàngàne be. Nènkù ki mwikalà kàbìdi mudimu wà bwambi mu matùkù à ndekeelu, nebìikale bilamàkàne menemene.

135 Bu mùdi cyanza cyèbè—cyèbè ciikàle cyà cilelèlè, nè mu—mundidimbì wà cyanza cyèbè mwikalè ciibùlòji; pàdibi bilwa, paanyimà pàà katanci, bìdi bilwa cintu cīm̀wè̀. Bìdi bilwa nànkù. Nènkù ke mùshindù awu wùdi Èkèleeziyà ùlwa, Mukàji-musèla ùlwa kùdi Kilistò, bàdi bàlwa umwe, ànu mùdi mulùme yònsò ewu nè mukàjèndè. Nwamònu anyi? Yèyè ùdi ùpweka buludi ku matùkù à ndekeelu, kadi twètù tudi tuteeta kwikala nè mwoyi mu dibàlakana dyà ditùkù dikwàbò? Yèyè udi umwèumwè awu makèèlèlè, leelù, too nè kashidi, ùdi ùMufwànyikija menemene nè Ebèlù 13.8 nè: “Yesù Kilistò umwèumwè awu makèèlèlè, leelù, too nè kashidi.”

136 Bu nè tuvwa nè mwoyi mu cikondo cyà Luther, tudi tutàngila paanyimà apa mene mu—mu cikondo aci, tudi tumòna ànu menemene, mu cikondo cyà Sààdi aci nè, Luther nguvwa mùsànjeela awu, ànu menemene, nè kàbalù kàakapàtukà aku, nè bikwàbò byàci bìvwà mu cikondo aci.

137 Tudi tusangana cikondo cyà beena Wesley, cikondo cyà Filàdèlèfiyà aci. Tudi tusangana cikondo cinène cyà ditàbuluja dyàkapàtukà adi, dinanga dyà bwànà bwètù, tudi tusangana Wesley ànu menemene mu mwaba wùdi Bible mwàmbè nè ke ùvwàye awu.

138 Tudi tucisangana leelù ewu ànu mwaba wùdi Ye mwàmbè nè ke wùvwàYe. Ndibà, cikondo citùdi nè mwoyi eci.

139 Tèèlejàayi, beena Ngelikà abu bàakapanga kuMumòna. Bwà cinyi? “Bakalenge, tudi baswè kumòna Yesù.” Bàakapanga

kuMumòna bwalu Ûvwa muDìbwikidije mu ntempèlù Wendè wa buntu, Nzambi mu muntu. Mubidi wà buntu ke cyàkabàfofomijà. Kabàvwa mwà kuumvwa to. “Wèwè, bu mùdì muntu, udi uDìvwija Nzambi, anyi mulongo wùmwe nè Nzambi.”

¹⁴⁰ Yèyè nè: “Èè, bu wèwè mwà kubàbiikidila ku mikenji, nènku kakwèna Mifundu nànsha mikesè yìdì mwà kunyangakajiibwakù to, nudi nubàbiikila nè ‘mbanzambi,’ ke civwàbo, bàvwa Dìyì dyà Nzambi dilwa kùdibo abu.”

¹⁴¹ Dìbà adi, Yèyè ùdi kaabujimà kàà Dìyì adi, Dìyì òvwa bwà ditùkù adi, Mwànà wa Nzambi, Mupikudi awu; pàvwàbi nè Nzambi, Yèyè mwinè, Wàkalwa pa buloba nè kusòmbela munda mwà Muntu, bwà kwambula lufù pambidi Pèndè, bwà kupikula byònsò nkòong, Muci awu wà mu budimi bwà Edènà, kì mmukàjì to; Mulùme awu, Adàmà mwibidì wàkafwà nè wàkabwela mu buloba awu, bwà kupàtula bintu abi, amen, mabèjì àvwà mamatè kale wàwa awu, bwà kuàtwàla mu dibìikà dyà ku lufù. Mbintu bùngì kaayì bìdì mwà kwambiibwa pa bwalu abu’s, mbifwànyine kutwàngata mèbà!

¹⁴² Kàdi tudi pa kaaba mpindyewu. Bàà Bisàmbà byà bendè bàà ditùkù adi bàakapangila kuCimòna, bwalu Cìvwa mu mubidi wà buntu. Ndi ndikonka ní twénza cintu cimwècimwè aci. Ndi ndikonka ní twénza cilèmà cyà dibungama cyàkenzàbo aci, kupangila bwà kuMumanya? Bwalu, Yèyè ùvwa, Yèyè Dìyì bwà cikondo aci, òvwa dimanyishiibwe mu mubidi wà buntu. Mwànà wa balùme uvwa kàyì mulonge kàlaasà, utùdiku katùyì bamanyè nè mmuyeku mu kàlaasà to. Katwàkadikù nè mikàndà yà yìleeja nè Yèyè mene mmupàtùkileku mu bulongolodi kampàndà bwà ditùkù adi to; kàlaasà nànsha kàmwè kalonga. Kàyì luumù lwà cintu nànsha cimwè to, ànu nè: “Muntu mupàle, mukwàciki wa mvinyò, mulundà wa bangènzàmpèkààtù, Muntu udi utwisha buloba katungu; mulela mu masandi, mamw’Èndè ùvwa mwimicisha kùdì mùsàlaayi kampàndà, nè kwangata dìnà Dyèndè bu Mwànà wa Nzambi, anyi ùDìbiikila mùdiye mupròfetà, mwena Ngalèlè ewu, mupròfetà wa ku dìnà ewu.”

¹⁴³ Kàdi Dìyì dyàkamwèneshiibwa! “Bònsò bààkaMwakidilà abu, Yèyè wàkabàpèèsha bukolè bwà kulwabò bàna bàà Nzambi.” Nènku ke mùdìbi kàbìdì leelù ewu, patùdì tumòna nkwa munène wa Nyumà Mwimpè ewu mumwèneshiibwe. “Bònsò bààkaMwakidilà abu, Yèyè wàkabàpèèsha bukolè bwà kulwabò bàna bàà balùme nè bàà bakàjì bàà Nzambi.” Yesù Kilistò mumanyishiibwe umwèumwè, ku Dìyì Dyèndè, mu lukòngò lwònsò.

Twìnyikàayi mitù yètù.

¹⁴⁴ Balundà bàànyì beena Kilistò, ndi muswè kunùlòmba, twànjàayibi ànu kwimana bwà kwelangana meeji bwà katanci kakesè cyanààna. Eci m’Bulelèlè anyi cidi ntùpàkànyì? Mmwómò anyi? Cyòci ciikàle Bulelèlè, tudi beena dibànzà

bwà kufila byònsò. Kutùyaayà nkwèpi? Diimana dyà cyôci eci didi penyi? Mmunyi mùdi mwà kwikala mutwìshìibwe nè udi mubingè? Mpindyewu, “ku cibangidilu, Yèyè wàkadi Dìyi,” nè Dìyi didi dijingulula meeji adi mu mwoyi. Dyàkenza nàнку mu baprófetà, Dyàkenza nàнку mu Kilistò, nè Yèyè mmucilayè mu matùkù à ndekeelu, bwalu Yèyè ùdi umwèumwè awu makèèlèlà, leelù, kashidi.

¹⁴⁵ Taatù wa mu Dyulu, angàtaku Dìyi Dyèbè, ùDitèèkè mu mwoyi wà buntu, bwà nè bôbò. . . bantu bônsò pàmwè, dilòòlò edi, kasùmbù kakesè kàà bantu aka mwab’ewu. Tudi bamanyè, Mukalenge, nè tudi—tudi nè mwoyi mu mindidimbì yà Dilwa Dyèndè, nè mindidimbì yikaadi yenda yishàala milelèlà, ku cidimu nè ku cidimu. Tudi tumòna bimanyinu bimwènèka, bintu bìdi bìkwàcisha bwôwà. Tudi tumòna mu bibèjibeji nè mu bikàndàkàndà. Ngondo ùdi wàndamuka mashi. Tudi tumvwa bàakula bwà dikanka dyà buloba pa buloba bujimà, ditaayisha buloba bujimà.

¹⁴⁶ Nènku, mpindyewu, dîngà ditùkù cyôci kunyùkusha buloba bujimà, pàakabèngiibwà Mwànà wa Nzambi byà bantu bônsò bamanyè nè kupoopediibwa pa nkùrusè. Nènku mpindyewu tudi tujandula nè kasùmbù kanène, kàdi kàbìikidiibwa nè Nsangilu wa Maèkèleeziyà wa Buloba bujimà, bàdi bàMubènga byà bantu bônsò bamòne, bu mwàkambàbo mu (eci) Cikondo cyà Laodikiyà emu nè: “Úvwa pambèlù pàà èkèleeziyà, ùkookola ku ciibi, ùteeta bwà kwalukilamù.” Nènku mpindyewu tudi tusangana nè kùvwa dikanka dikwàbò dyà buloba dyàkatuutà cyôci eci, kî mmatùngà makwàbò to, ditùnga edi, kunyùkusha buloba bujimà; Yesù wàkabèngiibwa byà bantu bônsò bamòne. Nènku Yèyè mmwimàne ùlòmba, dilòòlò edi, mumanyishìibwe ànu byà menemene ebi nè, umwèumwè awu makèèlèlà, leelù, too nè kashidi.

¹⁴⁷ Swàkù bwà beena kwitabuuja bàcimònè. Swàkù bwà aba bàdi bàsaamà bàcimònè, Mukalenge. Swàkù bwà aba bàdi kaaba aka dilòòlò edi bìikalè bakùmbàne bwà kulenga civwàlù Cyèndè, bu mwàkenzàbo mu matùkù àkaadi mapite awu. Ondòpàku babèèdi, nè sùngilàku bajìmine, tudi tulòmba mu Dìna dyà Yesù Kilistò. Amen.

Nzambi ànùbènèshè.

¹⁴⁸ Mpindyewu ànu katanci kakesè cyanàànà bwà mulongo wà babèèdi. Tudi ànu nè tusunsa dikùmi nè tùtaanu menemene, bwà kupàtuka pa dîbà. Mpindyewu cyònsò cîndi mufwànyine kwamba, ndi muntu, mèyi àanyì àdi mwà kupangila ànu mùdi muntu mukwàbò kanà yònsò ewu, twètù bônsò. Ndi munùjaadikile dilòòlò edi nè, muprófetà yònsò, bikwàbò byònsò abi, mbenzè bilèma byàbò. Kàdi Nzambi kàtu wènza bilèma to. Dìyi Dyèndè didi Bulelèlà. Mbanganyi bàdi bìitabuuja nè Yèyè ùdi Dìyi? [Disangisha didi dyàmba nè: “Amen.”—Muf.] Nzambi

ànùbènèshè. Ke mwaba wùdi diitabuuja dyànyì diibakila, kî mpa cingà cintu cidi cishààdile ku Mashi à Yesù to; nènku, cyà bushùwà, Yesù ùdi Dìyì.

¹⁴⁹ Mpindyewu ngèèla meeji nè Billy mmwâmbè. . . Mmwabànye twartà twà disambila anyi? Kùdikù—kùdikù twartà twà disambila twabanya anyi? Ncìvwa mumanyè to. Yèyè—yèyè mmwâmbè, dyâmbedi, nè kàvwa mumanyè nè nebàlwe bwà kutwàbanyayè to. Kàdi bôbô baabànye twartà twà disambila, netwènzè mulongo mukesè wà babèèdi.

¹⁵⁰ Muntu kampàndà, kùdikù kartà kàà disambila ùmwè kaaba aka anyi? Tùmonèbi udi nè kartà kàà disambila ùmwè. Èyowà, udi nè ùmwè anyi? To. Kartà kàà disambila nombà ùmwè, udi naakù nganyì? Kùdikù kartà kàà disambila ùmwè anyi? Èè, pàmwàpa kàvwa mufile kuumukila ku ùmwè to. Mbanganyi. . . ? Huh? [Muntu kampàndà ùdi wàmba nè: “Ùmwè nyèyè ewu apa.”—Muf.] Kaa, ùdikù anyi? Èyowà. Èyo, kartà kàà disambila nombà ùmwè, lwà kùnweku wìmanè apa kùndi eku, kartà kàà disambila nombà ùmwè.

¹⁵¹ Nombà ibìdi, nganyì udi nè nombà ibìdi? Nombà isàtù. Ànu bwà tusunsa tukesè cyanààna mpindyewu, tudi. . . Nombà isàtù, nganyì udi nè kartà kàà disambila kàà nombà isàtù? Tàngilàayi, kùdi muntu kaaba aka mu kalààlù kàà dyambwila babèèdi, muntu kampàndà àtàngilèku kartà kèndè aku, ní ùdi naakù. Nombà isàtù. Nombà inaayi, inaayi, nganyì udi nè kartà kàà disambila kàà nombà inaayi?

¹⁵² Nkartà kakesè. Mwanàànyì wa balùme anyi umwe wa ku cisùmbù neàtùùlùke nè kulwa nè twartà etu, kumpàlà kwènù, nè ùtùsambakaja twònsò, nè pashiishe bàdi bànwàbanyinatù. Nè pashiishe pàndi. . . Dìbà adi aci cidi cileeja. . . Tuvwa nè bantu musangu kampàndà bàteeta bwà kusùmbisha twartà twà disambila, nènku ke bwà cinyi mbamanyishìibwe mùshindù awu, mbwà nè kwèna mwà—kwèna mwà kubàsùmbisha to; bwalu yèyè kèna mwà kucyènza to, kwèna mumanyè nè nganyì udi ulwa kuntwaku to. Pàndi ndwa mwab’ewu, ncyèna mbangila ku nombà kampàndà nànsha. Ndi ànu mbangila mwaba kanà wònsò nàka. Mu lumingu lujimà elu, nenùmonè nè, nèmbangè cyanza mwandamuna, ntwà kumpàlà ntwà paanyimà, mbànda mpweka, ngàngata twartà twà disambila etu, nwamònu’s. Nènku ke mùshindù awu wutùdi tucyènza, ànu bwà kwamba nè muntu yònsò mu ditùkù dyònsò, wàbanya twartà, pa nànkù bantu ditùkù dyònsò edi bàdi mwà kupeta mpùngà wa kubwela.

¹⁵³ Ùmwè, ibìdi, isàtù, inaayi, itaanu. Nèmbàbìikilè umwe ku musangu, bwalu ncyèna muswè bwà muntu kampàndà mwikàle mpudimaci nè pashiishe wàmba nè: “Mòna’s, muntu nànsha umwe kî mmungambile to,” nudi numòna’s, kàdi mupangile mwaba mu mulongo wà babèèdi. Nènku pàmwàpa, nè kartà

kàà disambila, kabàvwa bafwànyine kumupèesha kakwàbò to, nwamònu's.

¹⁵⁴ Kartà kàà disambila nombà itaanu, udi naakù nganyì? Ùmwè, ibìdì, isàtù, inaayi, itaanu. Kartà kàà disambila itaanu? Bìdì ànu bîmpè. Pawikalà mutwishìibwe nè udi nè itaanu, juuka kuulu mwaba awu. Bìdì ànu bîmpè. Nombà isambòmbò? [Katùpà kàà mukàbà wà méyì munda mutupù—Muf.] Dikùmi nè ùmwè, kartà kàà disambila dikùmi nè ùmwè. Ùmwè, ibìdì, isàtù, inaayi, itaanu, isambòmbò, mwandamutekète, mwandamukùlu, citèemà, kartà kàà disambila dikùmi, nè dikùmi nè ùmwè.

¹⁵⁵ Tàngilàayi mpindyewu, mbifwànyine kwikala muntu kampàndà mpudimaci. Tàngilà kartà kàà mwena mutumba neebè. Ku nseke yònsò, ngèèla meeji nè mbasambàkàne mwònsò amu. Èyo. Mbanganyì bàdiku, Roy? Bàbalè tùmonebi. Dikùmi nè ùmwè? Dikùmi nè ibìdì, dikùmi nè isàtù, dikùmi nè inaayi, dikùmi nè itaanu. Ùmwè, ibìdì, isàtù, inaayi... Dikùmi nè itaanu. Èyo. Twánjàayi kwimanyina mwaba awu bwà katanci kakesè cyanààna, bwalu katwèna nè dîbà dipitepite búngi to.

¹⁵⁶ Mpindyewu mbanganyì bàdì kabàyi nè kartà kàà disambila kàdì nwtabuuja nè Nzambi neàkwondòpè, elà cyanza cyèbè muulu. Nzambi ànùbènèshè. Ncyà bushùwà, ikàlaayi nè diitabuuja adi. Mpindyewu vùlukaayi, nwènu balundà bàanyi, pàdìbo munkaci mwà kudìlongolola bwà mulongo wà babèèdì apa, mpindyewu, kanwikadi—kanwikadi—kanwikadi nwàya eku nè eku mpindyewu to, ànu bwà tusunsa dikùmi anyì dikùmi nè tutaanu tùdì tùlondà etu, too nè patwàdìlongolola, bwalu, nwamònu's, wèwè udi nyumà.

¹⁵⁷ Ndi muswè kunùkonkakù cintu kampàndà. Ngambi, nè mèmè kubala mu Mifundu nè, Yèyè ùdì umwèumwè awu makèèlèlè, leelù, too nè kashidi. Nè ànu bwà katanci kakesè cyanààna, kàvwa mwànji ànu kucyènza dyàmbedi to, munùleejè nè Yèyè ùdì nè cyà kupeta cintu ànu cyôci cimwècimwè eci cyàkàbìdì mu matùkù à ndekeelu. Mbanganyì bàdì biitabuuja nànkù? Malàkì 4 nè cyònsò cìdiyi nè cyà kwikala aci bwà kwalukila ànu kàbìdì, Yèyè kàbìdì ùpweka bwà kuDimanyisha mu Mukenji wà cipròfètà, bwà kwaluja myoyi yà bàna ku Diitabuuja, dyà cìpostòlò, Diitabuuja dyà Mpenta dyà baataatù. Ke cyôci aci menemene cìdì nè cyà kwenjiibwa. Kì ntwitabàayi kampàndà to; kàdì nkwalukila ku Diitabuuja dyà ku cibangidilu. Mpindyewu tudi twitabuuja aci nè mwoyi wètù wònsò.

¹⁵⁸ Mpindyewu bàmwè bàà kunùdì aku bàdì kabàyi nè kartà kàà disambila abu. Mpindyewu, vùlukaayi nè, mèmè ndi musadidi Wendè nè wèwè udi musadidi Wendè, Nzambi munda mwànyì nè Nzambi munda mwèbè. Wèwè udi mu lukèngelu kampàndà, nè mèmè ndi kaaba aka bwà kukukwàcila mudimu, kucitwàngaja pàmwè nè cìdì cìcìvwija Nzambi.

¹⁵⁹ Mpindyewu, mukàjì mutekète awu, musangu kampàndà. Ngánjì nnùpèèshè mukwàbò Mufundu, ngèèla meeji nè wùdi kàbidì mu Yone Munsantu. Kùvwa mukàjì mutekète uvwa, ùvwa, ùvwa nè dĩaamà dyà mashi àlwa munda. Twámbebi nè kàvwa nè kartà kàà disambila to, kàdi ùvwa muswe bwà bamusambidilè. Kàdi kùvwa bantu búngì cyanààna biimàne mwaba awu, kàvwa mwà kubwela mu mulongo to. Ki yèyè nè: “Bu mèmè ànu mwà kulenga civwàlù Cyèndè, nèngòndopiibwè.” Mbanganyì bàdi bavùlùke bwalu abu? Mòna’s, cyà bushùwà. Kàdi cyàkenzàye ncinyi? Kudifindayè mu musùmbà wà bantu awu nè kulengayè civwàlù Cyèndè.

¹⁶⁰ Mpindyewu, civwàlù cyà cyena Pàlèstinà ncilembèlèle cidilekèlèle, nè cidi nè civwàlù cyà mwìnshì, kàbidì, bwalu lupwishi lùdi lùkwàta ku mikòlò, nudi bamanyè’s, pa nàнку lùdi...ncilembèlèle cidilekèlèle. Mpindyewu udi mufwànyine kulenga nkooci wa muntu, kàdi kàyì mufwànyine kucyùm vwa to, ànu luzembe lwà nkooci wèndè awu’s. Kàdi twámbe bìshi bwà civwàlù cinène, cyà mupimbu, cyà bujitu cyà cyena Pàlèstinà aci, cilembèlèle cibwikile ku makàsà Èndè aku, nwamònu’s? Yèyè kàvwakù muumvwè aci to, mu mubidi emu.

¹⁶¹ Kàdi wàkalenga civwàlù Cyèndè nè kwalukilayè mu musùmbà wà bantu amu. Twámbe nè wàkasòmbela panshì. Úvwa mufwànyine kwikala mwimànyine kuulu, kàdi twámbe nè ùvwa musòmbè paanshì. Cyàkenzekà ncinyi? Yesù kwimana è kwamba nè: “WàNdengì awu nganyì?”

¹⁶² Kàdi, nudi bamanyè’s, Mùpostòlò Peetèlò wàkadyàmbidila nè aci civwa cyà macimbu be, mu mùshindù wà nè bantu... Mòna’s, yèyè wàkaMutàndisha bwà cyòcì aci. Mu ngaakwilù mukwàbò, ùvwa mufwànyine kwikala mwámbe nè: “Mòna’s, tàngilà, bantu bònsò bàdi munkaci mwà kuKulenga. Nebèlè meeji nè: ‘Wèwè udi mujimije lungènyi.’ Wamònu anyi? Mòna’s, bantu bònsò bàdi bàteeta bwà kuKulenga, Laabi.”

¹⁶³ Yèyè nè: “Kàdi’s Ndi njingulula nè Ndi mupete butekète. Bukolè,” dikàndà’s, “ndiNguumuke.”

¹⁶⁴ Mukàjì mukesè umwèpelè awu mpindyewu mmupàtùle dikàndà kùdiYe. Yèyè kukenzakana mu bateeleji amu nè kujandulayè mwaba wùvwàye ùsanganyibwa, nè Yèyè kumwambila lutàtù lwèndè nè civwà cyenzeke. Bible mmwámbe nè: “Yèyè ùdi mpindyewu Mwakwidi Munène udi mwà kulengiibwa kùdi dyumvwa dyà mateketa ètù.” Ncyà bushùwà anyi? Mpindyewu wèwè nè diitabuuja dimwèdimwè adi mu Yesù umwèumwè awu, neDikwenzèlè cintu cimwècimwè aci.

¹⁶⁵ Mpindyewu ikàlaayi nè kaneemu kàà menemene. Sambilaayi. Kanwèdi mpatà to. Itàbùùjaayi nè mwoyi wènu wònsò nè Yesù Kilistò ùdi umwèumwè awu makèlèlèlè, leelù, too nè kashidi, nè Yèyè neànùpèèshè mabènesha aa.

¹⁶⁶ Mpindyewu, Taatù, Nyumà Mwímpè Webè munène awu àtùbuulwileku Dìyì dimwèneshìibwe mu mubidi, mu mubidi wàbò nè mubidi wànyì. Nènku swákù bwà Dìyì nè mulayì wà Èvànjeeliyò wa dilòlòlò edi, ùdi muyiishìibwe awu, wikalè muumvwijìibwe kùdi Nyumà Mwímpè munène Yèyè mwinè, bwalu Yèyè wàkalaya nè Yèyè neikalè neetù. Nè Yèyè ùdi umweumwe awu makèèlèlè, leelù, too nè kashidi. Mu Dínà dyà Yesù Kilistò, tudi tudilàmbula twètù biinè Kùdi, pàmwè nè Mukenji, bwà Wèwè kushindika Dìyì nè bimanyinu bidì bilonda, muWàkenzà bilondèshile Maakò 16. Amen.

¹⁶⁷ Mpindyewu bantu bónsò biikàlè nè kaneemu kàà menemene. Bu nwènù mwà kuswà kanunyungiku to. Sòmbaayi ànu bapùwe menemene, nwamònu's. Mpindyewu, vùlukaàyi nè, misangu mikwàbò tudi tubwela mu ndululu. Mbanganyì bàdì kaaba aka bàdì beena Kilistò balediibwe cyàkàbìdì, tùmònààyi byanza byènù. Èè, abi's mbímpè, dìbà adi's nudi bamanyè cìndì ngàmba aci.

¹⁶⁸ Mpindyewu, ewu ki, ewu ke inàbànzà awu anyi? Ewu ke inàbànzà wa kumpàlà udi mu mulongo. Èyo. Mpindyewu, inàbànzà ewu nè mèmè, bwà ku dyànyì pàànyì dimanya, tudi beenyi, cimfwànyì cilenga cyà Yone Munsantu, nshapità mwi4. Yesù wàkatwilangana nè muntu mukàjì kampàndà ku ciinà cyà màyi cyà Sàmaalèyà, cintu kampàndà cyà mmwènekèlu bu eci nùnkù's, musangu wà nzànzànzà wàkatwilanganàbò kacya bààbàlèlè. Nènku bwà ku dyànyì pàànyì dimanya, ewu mmusangu ng'wà kumpàlà wutùdi tutwilangana. Katwèna bamanyàngàne to. Aci ní ncyà bushùwà, ànu bwà bantu kumònabò nè ncilelèlè, elà ànu cianza cyèbè muulu cyanààna. Pa nànkù nwamònu's, eci's n'twètù, musangu wà kumpàlà.

¹⁶⁹ Mpindyewu piikalàYe umwèumwè awu makèèlèlè, leelù, too nè kashidi, mpindyewu bwà kwakula nè mukàjì awu, mùshindù wàkenzelàYe mukàjì wa ku ciinà cyà màyi awu, mbifwànyine kwikala bwà kujandula cintu kampàndà cyàkenzàye, anyi cintu kampàndà cyà cibì kùdiye, anyi cintu kampàndà pa...cintu kampàndà cìndì nciyi mumanyè kantu nànsa kàmwè pa cyòci to, kàdi mufwànyine kumubuulwilaci. Pàànyì, kacya ncitukù mwànji kumumòna to, ndi ànu...mmusangu wà kumpàlà wùndiku nsanganyibwa mu cimenga eci. Nènku ndi ànu mwaba ewu, yèyè's mmwenyi. Mpindyewu aci ncifwànyine kuvwija Yesù Kilistò umwèumwè awu makèèlèlè, leelù, too nè kashidi anyi? Aci ncifwànyinekù kuvwija Dìyì dijinguludi dyà meeji àdì mu mwoyi anyi? Nwamònu anyi? Nwamònu anyi? Ncifwànyine kuMuvwija umwèumwè awu makèèlèlè...

¹⁷⁰ Kàdi byanza byànyì mbyôbì ebi, nè Bible wanyì, kacya ncitukù mwànji kumòna mukàjì awu to kacya bàndela. Nzambi mmumanyè nànkù. Yèyè ùdi ànu muntu mukàjì mwimàne mwaba awu. Ncyèna—ncyèna mumanyè cikwàbò cintu bwà

bwalu bwèndè kutàmba mwenyi kanà yònsò udi mwaba ewu, kùdiye to. Aci's ncilelèlè, nè yêyè mmumanyè nànkù.

¹⁷¹ Ncyèna mumumanyè to; kàdi Yêyè mmumumanyè. Nè Yêyè ùdi Dîyì, nè Dîyì didi dibuulula munsokòntù wà mu mwoyi, dyàmba maalu, à mabì, òmwambila cintu kampàndà. Yêyè mwenzè cintu kampàndà cibì, kàyì mutonda mwînshì mwà Mashi to, Yêyè neàmwambilè bwalu abu. Yêyè mwikàle mwena kwitabuuja wa budingibudingi, Yêyè neàmwambile bwalu abu. Yêyè mwikàle mwena kwitabuuja, Neàmwambile bwalu abu. Kwòkò kwikale cintu kampàndà cibì mu mubidi emu, neàmwambilèci. Yêyè mwikàle cintu kampàndà bwà cintu kampàndà cikwàbò, Yêyè neàmwambilèci. Ùdi mwà kwenza byònsò abi, bwalu Yêyè ùdi Nzambi. Yêyè mmumanyè bintu byònsò. Mémè ncyèna mumanyè to; mukàji awu kî mmumumanyè mémè nè mémè ncyèna mumumanyè to. Mpindyewu Yêyè mucibuulùle mu mùshindù awu, wêwè's udi mumanyè nè cìcidi ànu Dîyì, Ebèlù 4.12: "Dîyì dyà Nzambi didi dibuulula maalu masokòme àdì mu mwoyi, òmanya ngiikàdìlù awu."

¹⁷² Mpindyewu bu Nzambi mwà—mwà kutùbuulwila eci dilòlò edi, mwanèètù wa bakàji, bu mùdi wêwè nè mémè biimàne pàmwe kaaba aka, dîbà adi's udi mufwànyine—udi mufwànyine kumanya nè kî mmufwànyine kwikala mémè to. Bidi nè cyà kwikala Yêyè. Mpindyewu ndi muswè ànu kuyiikilakù neebè katanci kakesè, bwalu kwakula mu Dîyì mùshindù ewu, mòna's, ndi nyiisha, nudi numòna's, nè pashìishe ngààlukila. Ndi ngàakula ànu neebè mwàkenzelàYe mukàji wa ku ciinà cyà màyi awu amu, kwenza nendè muyiiki too nè mwàkajandulàYe cìvwà lutàtù lwèndè. Mpindyewu bu Nzambi mwà kunsokolwela cìdì lutàtù lwèbè, èè, neumanyè nè mbulelèlè ànyì kî mbwòbù.

¹⁷³ Nènku nwènù bònsò nenwìtabuuje anyi? Kùdiiku muntu mumanyè mukàji awu kuntwaku anyi? Elà cyanza cyèbè muulu ní kùdikù bantu kampàndà... Kaa, èyowà's, bantu bààbúngì mbamumanyè. Èyowà. Èyo.

¹⁷⁴ Mpindyewu Mukalenge Yesù ènzèku nànkù, nwamònu's. Aci kî ncifwànyine kwikala ànu Dîyì diyiiishibwe cyanààna to, ncifwànyine kwikala Dîyì divwijibwe mubidi, dyakula patòòke, dibuulula. Mpindyewu Bible kèna wàmba nè newikale mwimàne kaaba aka, nè cìdì cìkutàcisha aci to, nè byònsò bìdì bitàngilà bwalu abu, nè cyùdì mulwilè kaaba aka, anyi cyùdì mwenzè. Kèna wàmba aci to. Kàdi Dîyì nditùulùke bushùwà, didi dimanyisha mwakudi, nwamònu's, nè, Dîyì dyà Nzambi. Dîbà adi Mukenji mmulelèlè, dîbà adi Nzambi ùdi munkaci mwà kumanyisha nè Mukenji awu m'Bulelèlè. Dîbà adi dibàtiiza dyà Nyumà Mwimpè nè Èvànjeeliyò mu kaabujimà bìdì nè cyà kwikala Bulelèlè, byòbì bimanyishibwe mu mùshindù mujaalàme.

¹⁷⁵ Cintu cìmwèpelè ncyà nè, udi mubìndùlùke, mubìndùlùke

bikolè. Udi mutàcishìibwe kùdi cintu kampàndà. Ncyà bushùwà. Udi mutàcishìibwe. Cyôci ncikufikile kùkaadi cikondo kampàndà. Nènku cidiku ncyà nè, ndutàtù lùdi ku mukòlò wèbè awu. Lùdi ku mukòlò wèbè wà dyàbalùme awu. Udi nè bwòwà bwà nè nkànsèrè. Bidi bikutàcisha wèwè mujimà. Luseke lwà dyàbalùme alu kalwèna mu lwòlù to. Udi mutàcishìibwe mu cifù cyèbè amu, cikusaamisha. Aci cyôci cilelèlè, elà cyanza muulu. Kùciinyi to, itàbùùjà ànu cyanààna nè Yèyè neàkusàngajè. Udi uciitabuuja anyi? [Mwanèètù wa bakàji awu ùdi wàmba nè: “Amen.”—Muf.] Èyo, ndààku wenda ùsàkidila Nzambi bwà bwalu abu, nènku ùsangalè. Mukalenge àkubènèshè. Ndi muswè ànu kukutentekela byanza.

¹⁷⁶ Nudi nwitabuuja nè Yèyè ùdi umwèumwè awu makèèlèlè, leelù, too nè kashidi anyi?

¹⁷⁷ Mpindyewu cimfwànyì ncyôci eci cyàkàbìdì, mulùme wa batòòke, mukàji wa bafilke. Yesù mwena Yudà, mukàji mwena Sàmaalèyà's; nwamònu's, Yèyè wàkabàmanyisha nè kakwèna dishiilangana nànsha dikesè mu bukwàbantu to. Nzambi wàkatùfwila twètù bònsò. Ncyà bushùwà. Yèyè ùdi... “Nzambi wàkenza ku mashi àmwèpelè, matùnga ônsò.” Ditùnga ditwàkakolèlamu, kushintululadi diikala dyètù, kadyenà nè bwalu nè cidì munda mwètù to. Èyowà, ncyà bushùwà.

¹⁷⁸ Mpindyewu wèwè udi mwena Kilistò. Nè lùkàsà lwònsò ndi mwà kuumvwa njiyà yà mwakidilu mulenga, yà nè udi mwena Kilistò. Ke nyumà wèbè nyèyè awu. Aci's ncifwànyine kwikala ànu mwàkambàYe nè: “Mònaayi mwena Izàlèlèlè, mwena munda mùdi kamùyì budimù.”

¹⁷⁹ Mpindyewu, ndi mmòna nè udi usaama bikolè. Diteeta didi dijaadika nè udi nè kànsèrè. Ncyà bushùwà. Nènku kànsèrè aku, udi witabuuja nè Yèyè ùdi mwà kungambila mwaba wùdiku anyi? Bilondèshile makùmi à macinka, kànsèrè aku kàdi mu dila dinène. Aci ní ncyà bushùwà, elà cyanza cyèbè muulu. Mpindyewu udi mumanyè nè Cintu kampàndà nciimàne kaaba aka cidì cikumanyè. Udi witabuuja nè Yèyè neàkusàngajè anyi? Bu diitabuuja dyèbè mwà kuMukòka mwaba awu, kulenga civwàlù Cyèndè nè kubuulula cintu cimwècimwè cyàkenzàYe musangu awu aci, dībà adi ndààku uMwitàbùùjè nènku neùsàngajiibwe ku cyôci aci, nè neùsangalè. Bu wèwè mwà kuciitabuuja, kwitabuuja ànu cyanààna, ànu bipeepèlè nànkù, mwanèètù wa bakàji, ànu bwà kwitabuuja cyanààna. Kwèdikù mpatà to.

¹⁸⁰ Ndi ncinka nè tudi beenyi, kàbìdì, muntu nè mukwèndè anyi? Katwèna bamanyàngàne to. Nzambi mmutumanyè bònsò bàbìdì. Udi witabuuja nè Nzambi ùdi mwà kumbuulwila lutàtù lwèbè anyi? Udi witabuuja nè Yèyè ùdi mwà kumbuulwila lutàtù lwà muntu kanà yònsò udi pambèlu pààpa anyi? Udi uciitabuuja anyi?

181 Mbanganyi kunùdi aku bàdi bàciitabuuja?

182 Udi wela meeji kaayi bwà bwalu abu? Udi witabuuja nè mwoyi wèbè wònsò anyi? Dìbà adi mabwe àdì mu kanyòòngà kèèbè aku kàakukutàcisha kàbìdì to. Mémè—mémè kucyùmwa cìlwa nè, mémè “mvwa mbala mu meeji à bantu,” mvwa muswè ànu bwà nwènù kumòna nè ncìvwa ngèzza nànkù to.

183 Èyo, udi witabuuja nè mémè ndi musadidi Wendè anyi? [Mwanèètù wa bakàjì awu ùdi wàmba nè: “Ndi ngiitabuuja bushùwà.”—Muf.] Nè mwoyi wèbè wònsò anyi? [“Nè mwoyi wànyì wònsò.”] Twasàkidila. Wèwè udi mwena Kilistò. [“Ncìndi.”] Èyowà, ke cyùdì, kàdì kì ngwa ku dínà to; mwena Kilistò mulelèlè, nènku udi mulediibwe cyàkàbìdì. Èyo. Udi witabuuja nè—nè mémè, bu mwanèènù wa balùme, ncyèna mumanyè kantu nànsha kàmwè bwà bwalu bwèbè to; kàdì Taatù wetù wa mu Dyulu, Udi mutùmanyè twètù bònsò bàbìdì awu, mmufwànyine kunsokolwela cìdì lutàtù lwèbè anyi? [“Ndi ngiitabuuja.”]

184 Ndi mmòna nè udi naalù luvulè. Udi mupicile ku dipandiibwa, nè dipandiibwa adi òvwa mbwà kànsèrè. Mbakuumùshe dibèèlè òmwè, ncyà bushùwà, kàdì ucìdì ànu mutùngùnùke nè kutàcishiibwa naadi. Udi witabuuja nè neùmfwè bìmpè kubangila ku mpindyewu anyi? Picilà ànu mwab'ewu, mwikàle witabuuja nè mwoyi wèbè wònsò. Nè Nzambi àkubènèshè, Mukalenge Nzambi àkwondòpèku. Swàkù. . .

185 Ikàlà nè diitabuuja. Kwèdì mpatà to. Itàbùùjà ànu nè mwoyi wèbè wònsò nè Yèyè ùdi umwèumwè awu makèèlèlè, leelù, too nè kashidi.

186 Mpindyewu udi witabuuja anyi, inàbànzà? Katwèna bamanyàngàne to. Mémè ncyèna mukumanyè to. Wèwè kwèna mummanyè to. Tudi beenyi ànu bàà menemene aba. Kàdì Taatù wa mu Dyulu mmufwànyine kumbuulwila cintu kampàndà cyà cibì, cintu kampàndà cyùdì mwenzè, cintu kampàndà cìvwa kaciyi cikèngela bwà wèwè kwikala mwènzè to, anyi cìvwa cikèngela bwà wèwè kwikala mwènzè kàdì kùyi mucyenze nànsha, nànsha cyòci ciikàle cinyi, nànsha cìfwànyine kwikala cinyi, newitabuuje nè Yèyè ùdi umwèumwè awu makèèlèlè, leelù, too nè kashidi. Udi mumanyè nè mbìfwànyine kwikala ànu Yèyè udi mufwànyine kucyènza. Mmwômò anyi?

187 Udi mutàcishiibwe kùdì—kùdì—kùdì cyùjà, nè cyùjà aci cìdì ku mutù. Udi nè bwòwà. Cyà bushùwà. Udi witabuuja nè necipatukè mpindyewu, bwà nè Yesù Kilistò neàkusàngàjè anyi? Bu muwàcìtàbùùjì amu, ke mwàkwenzekelàbi. Ndààku mwikàle witabuuja. Amen. Nzambi àkubènèshè. Ànu mu njila webè amu, itàbùùjà. Kwèdì—kwèdì mpatà to. Itàbùùjà ànu nè mwoyi wèbè wònsò.

Ikàlà nè diitabuuja. Kwèdi mpatà to. Itàbùùjà ànu nè mwoyi wèbè wònsò.

¹⁸⁸ Cifù cyèbè cidi cikutàcisha. Dìsaamà dyà cifù. Udi muswè kuya kadyà anyi? Itàbùùjà. Ki cyôci aci.

¹⁸⁹ Wetwàwù? Katwèna bamanyàngàne to. Mémè ncyèna mukumanyè to, wèwè kwèna mummanyè to. Kàdi kùdi Kampàndà mwaba ewu, udi kàyì ùmweneke to, kàdi mubwikila munkaci mwètù, udi mumanyè cidi lutàtù lwèbè. Ndi nkumòna uteeta... Èyowà, mbinyòka. Udi witabuuja nè Yèyè neàkusàngàjè ku cyôci aci anyi? [Mwanèètù wa bakàji awu ùdi wamba nè: “Èyowà.”—Muf.] Ndàaku, cītàbùùjè, nè kwàdyakucibukilakù panshi to bu wèwè ànu mwà kuciitabuuja.

¹⁹⁰ Wèwè udi nè bintu byàbùngi bìdi bikutacisha. Dìsaamà dyà bainàbànzà, kùkaadi ntàntà mule; pashìishe, cikiwàbò cintu, cyèbè—cyèbè cintu cinène cyùdi muswè bwà kwondopiibwaku, mbinyòka abi, kàbidi. Udi witabuuja nè Yèyè neàkusàngàjè anyi? Ndàaku, cītàbùùjè. Ke cyònsò cidici menemene, ikàlà wèwè ànu nè diitabuuja nè kwèdi mpatà to.

¹⁹¹ Ndi mwenyi kùdi. Kacya ncitukù mwanji kukumòna kacya pàanyì bàndela to. Kùdi mukàji mukwàbò udi utùngunuka nè kumwèneke. Bu Nzambi mwà kunsokolwela cintu kampàndà pa bìdi bikutàngila... Èyowà, èyowà, ncyùjà cyà kansèrè; udi wamba kupandiibwa. Mukàji mukesè udi musòmbe mu nkwasà wàwa mmukùngàmàngàne nè cintu cìmwècìmwè aci, s'ncyùjà cyà kansèrè. Udi witabuuja nè mwoyi wèbè wònsò anyi? Udi witabuuja anyi? Nzambi neànüsàngàjè bònsò bàbidi bu nwènù mwà kuciitabuuja. Mutentèkèle cyanza cyèbè pambidi apu. Ke cyôci aci. Mu Dîna dyà Mukalenge Yesù, mu Dîna dyà Mukalenge Yesù, swàkù òndopiibwè, mwanèètù wa bakàji.

¹⁹² Nwamònu's, nwènù, ncyèna mwà kuumvwija aci to, balundà bàanyì, kanùndòmbi bwà mémè kucyùmvwija to. Dicincimikiibwa, bukolè, umwe... Cyùjà cyà kansèrè ncinyi? Ncyùjà. Cyùjà ncinyi? Divulangana dyà tubùlù twà mashi. Wèwè udi cinyi? Divulangana dyà tubùlù twà mashi. Cyùjà cyà kansèrè ncinyi? Mu Bible, cidi cibìikidiibwa nè ndémon, mukengeshanganyi; ngàmumònu wèla mbilà mikolè ukèba dikwàcisha, nè aci cyàndamuna. Nwamònu's, bàbidi bafwànàngàne ànu menemene, nènku ke—ke cyàkacyènzà ncyôci aci. Èyo.

¹⁹³ Lwàkù, inàbànzà. Katwèna bamanyàngàne to. Udi mupete dìsaamà dyà mutù mubinduluke kùkaadi ntàntà mule, ke didi dikufikishe ku dipeta dìsaamà dyà cifù, dìsaamà dyà cifù, cyùjà cyà mu cifù, cyèla màyi à bwanji mu cifù cyèbè amu, nè bwanji abu bùkwàta nè meenù, nè bikwàbò. Udi witabuuja nè Yesù Kilistò neàkusàngàjè mpindyewu anyi? [Mwanèètù wa bakàji awu ùdi wamba nè: “Amen.”—Muf.] Èyo, nànkù ndàaku ukadyè didyà dyèbè dyà dilòlò. Itàbùùjà nè mwoyi wèbè wònsò

nè, Yesù Kilistò neàkusàngàjè. Cítàbùùjè wêwè ànu cyanààna mpindyewu.

¹⁹⁴ Katwèna bamanyàngàne to. Nzambi ùdi musòmbèle penyi mu muntu? Mu mwoyi. Ke mwaba wùdi lutàtù lwèbè ngwôwò awu, cìdi mu mwoyi wèbè, kî mbwà dipangila dyà Nzambi to. Kàdi ku dilekelela dyà diitabuuja dyèbè, bwà kwondopa disaamà dyà mwoyi adi, nènku neúmvwè bîmpè. Ndààku, mwikàle witabuuja, itàbùùja nè mwoyi wèbè wònsò. Mpindyewu, kwèdi mpatà to. Ndààku, mwikàle witabuuja.

¹⁹⁵ “Bu wêwè mwà kwitabuuja, bintu byònsò bìdi mwà kwenzeka.” Mbanganyi bàdi biitabuuja nè mwoyi wènù wònsò? Nudi nwitabuuja nè Nzambi ùdi kaaba aka bwà kunùsàngaja anyi? Udi...? Dîyi ndivwijiibwe mubidi anyi? Ncinyi aci? Mpindyewu, nànsha mèmè ngiitabuuja bishi, bìkèngela witabuuje wêwè, pèèbè. Nwamònu’s, mukàji wàkalenga civwàlù Cyèndè awu, wàkiitabuuja.

¹⁹⁶ Muntu mulùme nyèyè ewu musòmbè lwà kaaba aka muntàngile. Ùdi nè kààmunda nè nsundu. Udi witabuuja nè Nzambi neàkusàngèèjè anyi? Wêwè mucyènzè, udi mwà kupeta cyùdi mulòmbè aci.

¹⁹⁷ Kùdikù muntu mukwàbò kaaba aka udi witabuuja nè Nzambi ùdi wòndopa babèèdi nè beena ntàtu anyi? Udi witabuuja nè Dîyi, dilòlòlò edi, ndimanyè bwalu busokòme bwà mu mwoyi anyi? Udi witabuuja aci anyi? Èyo. Mmpindyewu ke wutùdi paanyimà pàa dîbà menemene bwà citùvwà.

¹⁹⁸ Mmunyi mùdi mufwànyine kwitabuuja eci? Mpindyewu nudi bamanyè nè Mufundu awu mmutòokèshìibwe tòò, kanùlekedikù cibwikilu cyà mubidi cìnùpangisha mpindyewu to, nwamònu’s. Vùlukààyi nè, n’Dîyi dilaya dyà leelù. Mbanganyi bàdi bumvwa aci? Dîyi dilaya. Ncyèna mumanyè búngi bwà ditentula dyùdi mumòne to. Kàdi, ndi ngambilamù, Yesù Kilistò wàkalaya eci, nè eci ncilelèlè. Nwamònu’s, aci, aci ncilelèlè.

¹⁹⁹ Mpindyewu Yèyè ùdi kàbìdi wàmba, mèyi à ndekeelu àkambàYe kumpàlà kwà kuumukaYè pa buloba, kubànda mu Dyulu, mmwàmbè nè: “Ndàayi pa buloba bujimà,” Maakò 16, “nùyiishè Èvànjeeliyò. Ewu udi witabuuja nè ùbàtijiibwa neàsùngidiibwè; ewu udi kàyi witabuuja neàpiishiibwè. Bimanyinu ebi nebìfilè aba bàdi biitabuuja?” Kacya nukàadikù bacìbalè anyi? Mudimu wa ndekeelu wùvwa cinyi? “Bòbò batentèkèle babèèdi byanza, babèèdi nebàsangalè.” Mbanganyi bàdi bamanyè nè aci ncilelèlè?

²⁰⁰ Mpindyewu yònsò wa kunùdi, kùkaadi ndambù wa tusunsa, wèdi cyanza muulu nè wêwè uvwa mwena kwitabuuja. Mpindyewu kanwènaayikù baswè ànu kutentekelangana byanza muntu nè mukwèndè mwaba awu anyi? Kabyàkukèngela bwà twètù kutùngunuka to; nudi bamanyè nè Yèyè ùdi kaaba aka, bwà cinyi kubènga ànu kutentekelangana byanza muntu nè

mukwèndè nè kusambidila muntu udi musòmbe ku luseke lwèbè awu, pawikalà mwena kwitabuuja. Mpindyewu, ke mwàkambàYe's! Mpindyewu, to, kî ng'ànu mèmè nkààyanyì to; ngwèwè, yònsò wa kunùdi. Nudi nuciitabuuja mpindyewu anyi? Ambàayi nè: "Amen." [Disangisha didi dyamba nè: "Amen."—Muf.] Eyo.

²⁰¹ Mpindyewu, tàngilàayi, kudisambididi wèwè mwinè to, bwalu muntu udi mukutentèkèle byanza awu ùdi munkaci mwà kukusambidila. Nwamònu's, udi umusambidila, nè mèmè nènñusambidilè nwènù bònsò. Nènku bu nwènù ànu mwà kuciitabuuja, nè díyi òmwè, eci neciikalè cimwè cyà ku bikondo byà bitàmbe bunène binùkaadiku kacya bamòne.

²⁰² Bwikadi bwà Yesù Kilistò, bùvwà nè cyà kukenkesha èkèleeziyà abu, bwà kumanya nè mu matùkù à ndekeelu aa mùdi twitabàayi nè màngumba nè tusumbù nè byònsò bìdi—bìdi bipusè Díyi dyònsò pambèlu, nè Yesù Díyi awu pambèlù pàà èkèleeziyà, kàdi nwènù nuMumòna wàlukila buludì munkaci mwà bantu nè ùDimanyisha mwàkalayàYe nè: "mu matùkù à ndekeelu piikalà Mwànà wa muntu munkaci mwà kubuuludiibwa." Wàkabuuludiibwa mu dibàtiiza; Wàkabuuludiibwa mu dyondopa dyà kùdi Nzambì; s'ki Yèyè ewu mu cyambiibwa Cyèndè cyà ndekeelu. Vùlukàayi nè, aci cìvwa ncintu cyà ndekeelu cyàkamònà Abraham kumpalà kwà kapyà kupònakù nè kulumbulwisha bàà Bisàmbà byà bendè, nè kumpalà kwà mwànà mulaya awu kubwelayè mu cyalu, Izàkà. Eci ke cintu cyà ndekeelu ciikalà èkèleeziyà wa beena Kilistò mwà kumòna, mu cimanyinu cyà cishimà, too nè ku òmwènèka dyà Yesù Kilistò. Piikalàbi nè Nzambì mmumpèeshe dyèsè kumpalà kwènù, ngiitabùùjaayi mu Dìna dyà Mukalenge, kakwèna cintu cikwàbò nànsha cimwè cidi cishààle mu Bible bwà kwenjiibwa to pa kuumusha kwangata cimanyinu cyà nyama wa lwonji; nè nwènù nudi nè Citampì cyà Nzambì.

²⁰³ Sambidilà muntu udi mulààdika mwaba awu, udi musòmbe ku luseke lwèbè awu. Mutentèkèle cyanza. Mvwa—mvwa nkeba bàdi bacibùkile panshi; ncyèna mmòna nànsha umwe to. Kàdi kalààlù kàà dibùnya aku, ngèèla meeji, kàkaadi kamanè, kaa . . . Eyo, tentèkèlàngànaayi byanza muntu nè mukwèndè nè sambilaayi.

²⁰⁴ Yesù munanga, Mwànà munène wa Nzambì udi nè mwoyi wa kàyi katòba, Udi kaaba aka dilòòlò edi mu mmwènèkelu wa Nyumà Mwîmpè awu, mushintùlùle mmwènèkelu Wendè nè mutùulùke nè mubuulùle Díyi Dyèndè ànu mu mubidi wà buntu; balùme, bakàji, bàà mu bipidi byònsò byà mwoyi, ùleeja nè Yèyè ùcidi ànu nè mwoyi. Yèyè ùdi umwèumwè awu makèèlèlè, leelù, too nè kashidi.

²⁰⁵ Mukalenge Yesù, tudi kaaba aka mu cimenga cinène cyà Topeka eci, tudi kaaba aka badisangishe nè bàna Bèèbè.

Nènku tudi tulòmba, bwà nè bu mùdì Wêwè mumanyishìibwe bikolè munkaci mwètù, bwà Wêwè kushindika mpindyewu Dîyì Dyèbè, mudimu wa ndekeelu, wàmba nè: “Nebàtentekelè babèèdì byanza, babèèdì nebàsangalè.” Nènku bantu, bàdì bàtonda, nè balediibwe cyàkàbìdì ku Nyumà, bàdì mpindyewu munkaci mwà kutentekelangana byanza muntu nè mukwèndè, bwà kudifwànyikija muntu nè mukwèndè, nè mudimu Wèbè mutùtùma naawù nè Dîyì Dyèbè.

²⁰⁶ Mpindyewu, Sàtaanà, kwèna mwà kushààla kàbìdì mulamè babèèdì aba ntàntà mule to. Bôbò bàdì bantu bàà Dîyì dyà Nzambì. Pàtukààyi munda mwàbò, nwènù mabèèdì àdì mu mubidi wàbò awu. Kanùbàkèngeshi kàbìdì to. Bàlekèlààyi bàye badishikàmìne, kubangila ànu ku dilòlòlò edi. Twètù, bu basadidi bàà Nzambì, bàdì bamanyishìibwe bwà kushindika Dîyì abu, tudi tunùtùmina dîyì mu Dìnà dyà Nzambì udi nè mwoyi, Yesù Kilistò Dîyì divwijìibwe mubidi munkaci mwètù, pàtukààyi mu babèèdì aba, nè bàlekèlàayi bàye, bwà bwalu bwà Bukalenge bwà Nzambì, nè dîyì ditùma ditùpèèsha kùdì Yesù Kilistò Mwànà wa Nzambì. Amen.

²⁰⁷ Bònsò bàdì biitabuujà nè biitàbe dyondopiibwa dyènù, kakùyì mudidimbì wà mpatà nànsha mukesè to, mwab'ewu munda mwà cibwikilu cyà Butùmbi bwà Shekinàh, bwà kumòna Dîyì dilaya ditwikala mwà kutàmba kubwelamu lumingu elu, tuDimòna dimwènèshìibwe mwab'ewu mene kumpàlà kwètù, tùjuukilààyi kuulu twàmbè nè: “Ndi mpindyewu ngiitaba dyondopiibwa dyànyì. Ndi ngiitabuujà nè Yesù Kilistò ùdì ùngondopa mpindyewu. Nè mwoyi wànyì wònsò, ndi nciitabuujà. Ndi nciitaba, mu Dìnà dyà Yesù Kilistò.” Nzambì ànùbènèshè. Elààyi byanza byènù muulu mpindyewu. Nè muntu nè muntu wa kunùdì, mu mùshindù wènù sungasunga, Mwitàbùùjaayi bwà dyondopiibwa dyènù. Amen. 

64-0617 Kilistò Mumanyishìibwe Wa Bikondo Byônsò
Municipal Auditorium
Topeka, Kansas États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org